

المسرحية الكوميدية

ملك الزبالة

أو

الزباليين

تأليف

السيد حافظ

الرؤيا الأولى ١٩٩٢

## الفصل الأول

### تنبيه وتحذير

حقوق المؤلف محفوظة .. لا يحق لأى فرقة مسرحية هواة أو محترفين فى مصر أو الوطن العربى تقديم هذه المسرحية الا بتصريح من المؤلف ولا يحق إعداد النص أو تحويله الى لهجة عربية أو اقتباسه الا بتصريح من المؤلف.  
حقوق العرض المسرحى والنشر محفوظة للمؤلف.

المؤلف

## عزیزى المشاهد

مسرحية ملك الزباله حدثت بالفعل .. وقائعها فى دمشق عام ٣٦٥ - ٣٧٣هـ. كما ذكرها د. شاكى مصطفى فى دراسته فى مجلة الآداب والتربية فى جامعة الكويت العدين الثالث والرابع يونيو وديسمبر ١٩٧٣ - ٢٢٣. وكما ذكر بن الاثير ص ١٠ - ٢٠٥.

أهدى هذه المسرحية الى " الزبال " النبيل قسام التراب أو قنيم الزبال الذى حكم الشام لمدة سبع سنوات فنظف شوارعها وعدل بين الناس وألغى الوزراء والأمراء والبيروقراطية فى الوقت الذى فشل فيه كل من العزيز الفاطمى فى مصر والخليفة العباسى فى بغداد وامبراطور الروم.. وأمير القرامطة .. الى هذا الزبال الذى رفض أن ينام على الحرير وأن يسرق شعبه أو يسرق أمام عينه. الى تاريخنا العربى الجميل فى زمن حكم الزبالين.

(إلى أخى الأديب النبيل دكتور رمضان حافظ الحالم بعالم جميل)

المؤلف

السيد حافظ

## المشهد الأول

### يفتح الستار فى المسرحية

الزمان	: فى الفجر .. ضوء ازرق.. فى عام ٢٦٥ هـ.
المكان	: دمشق .. إحدى الضواحي .. أكوام الزبالة.. كوخ بسيط يطل على أكوام الزبالة.. يدخل زعتر يجد سعد (زبالان قويان من رجال قسام التراب) ينظ في الزبالة.
زعتر	: بتعمل ايه يا سعد ؟
سعد	: ح أكون بعمل ايه.. زى ما انت شايف.. بفرز زبالة الوالى والتجار والأغنياء.
زعتر	: والفقراء.
سعد	: سبت لك زبالتهم.. أصل ريحيتها وحشة قوى.. يا أخى شئ غريب الفقير فقير فى كل حاجة.. حتى زبالتة تلاقيها فقيرة.
زعتر	: اللى يسمعك كده يقول عليك غنى.
سعد	: غنى النفس والحمد لله.
زعتر	: لقيت فاكهة ورز ولحمه.
سعد	: باقية خروف مشوى من زبالة سيدنا القاضى وباقية خروف مشوى ورز بالخلطة من زبالة الوالى.
زعتر	: (يفتش فى زبالة الفقراء) دى زبالة عمك منصور صباغ الحمير. مافيهاش غير عيش معفن.. استغفر الله.. اسمع يا سعد زى ما قالنا المعلم قسام.. لو لقيتم حاجة تنفع للأكل فى زبالة الأغنياء أدوها للفقراء اللى زبالتهم بتصرخ.
سعد	: من الزبالة تعرف البيوت.. حافظ أوامر المعلم قسام التراب يا ولد يا كنتش يا كنتش.. يا كنوش الزفت.
كنوش	: أيوه يا معلمى (يدخل)
سعد	: تعرف بيت عمك منصور صباغ الحمير؟
كنوش	: عارفه
سعد	: روح اديله دول وقوله المعلم قسام التراب ببسلم عليك.
زعتر	: بسرعة يا ولد
كنوش	: حاضر (يجرى وهو يحمل اللفة)
زبيدة	: اعملى شاي يا مريم وتعالى (من خارج المسرح)
مريم	: حاضر يامه
زبيدة	: وصحى أخوكى وليد احسن تروح عليه نومه زى امبارح.
مريم	: (من الخارج) حاضر يامه.
زبيدة	: (تظهر على المسرح) صباح الخير يا سعد.. صباح الخير يا زعتر
سعد	: صباح النور يا ام مريم يا أجدع ست فى الشام.
زبيدة	: والبنى الشام مليانة ستات جدعان بس الزمان خوان يا سعد.
زعتر	: هو فين المعلم قسام ؟.

- زبيدة : زمانه جاى.. خلصت الشغل اللى عندك يا سعد ؟
- سعد : فرزنا الزبالة زى ما قال المعلم قسام.. وشيلنا الحاجات اللى تنفع من زبالة الأغنياء ووزعناها على الفقراء زى ما قال.
- زعتري : كله تمام يا أم وليد.. أول مرة نشوف ملك الرجال قسام التراب يدى من زبالة الأغنياء للفقراء.
- زبيدة : لو كان بأيده.
- سعد : بايده لو يشاور عم قسام التراب لننهب قصور الاغنياء لكن هو بيقول المال الحرام بياخد الحلال فى سكتة واحنا معاه فى فكرته.
- رجل ٢ : (يدخل) ايوه يا معلم سعد وزعت اللى قلت عليه.
- شرطى ١ : (يدخل شرطيان)
- زبيدة : فين قسام التراب ؟
- شرطى ٢ : قول صباح الخير الأول.. اتو البيوت من أبوابها مش فين قسام التراب؟
- زبيدة : جرى ايه يا زبيدة جوزك فين ؟
- زبيدة : شوف يا خويا اللفظ سعد.. انا اسمى أم وليد والمعلم اسم أبو وليد واسمه الحقيقى أبو الرجال.. ملك الرجال.. مش فين قسام التراب يا زبيدة.. جتك كوبه وكبيبه.
- سعد : يا فتاح يا عليم على الصبح (يشمر عن ساعديه)
- زعتري : فيه ايه علشان عايزين المعلم قسام ؟
- شرطى ١ : فيه ضرايب عليه .
- زبيدة : (تصرخ) ضرايب عليه .. يا لهوى.. هو بيتاجر فى الذهب وألا فى الماس دا بيشتغل فى الزبالة والتراب.
- شرطى ٢ : برضه عليه ضرايب.
- سعد : عملتوا ضرايب على التجار ماشى.. الذهب والفضة ماشى.
- زعتري : ضرايب على التجارة اللى داخله واللى خارجه من البلد ماشى.
- زبيدة : ضرايب على الزبالين.
- شرطى ٢ : جوزك قسام التراب شيخ الزبالين.. معلم الزبالين يدفع على كل زباله يشيلها سحتوت.
- زبيدة : إن شاء الله تموت.. قال سحتوت قال.
- شرطى ٢ : فين قسام التراب يا أم وليد خلصينا.
- زعتري : انتوا بتهزروا يا عساكر أكيد.. ضرايب إيه اللى على الزبالين؟
- منصور : يا ناس (يدخل وخلفه شرطى) يا ناس الحقونى.
- زعتري : وهو يدفع ليه.. هو بياخد من اللى عايز يصبغ.
- شرطى ٤ : حتدفع الضرايب يعنى حتدفع الضرايب يا صباغ الحمير.
- منصور : منين ؟
- شرطى ٤ : ياخد من كل زبون زيادة ويدفع للديوان.
- زعتري : يا ناس دا كلام ضرايب على الصباغين كمان.
- شرطى ٣ : ما تتفلسفش يا طويل اللسان.
- سعد : لم لسانك يا عسكرى السلطان.
- منصور : الحقونى يا ناس انا دفعت ضرايب للعطار على الصبغة قالى دى ضرايب جديدة على صبغة بدينار تدفع سحتوت للسلطان دفعت.. جايين دلوقت يقولوا ادفع سحتوت على كل حمار لينا.. ولمه من كل حمار بيصبغ حماره.
- مريم : (تدخل تحمل صينية الشاى) الشاى يا امه (تفاجأ برجال الشرطة) فيه ايه

على الصبح.. عسكر يا فتاح يا عليم.. يا رزاق يا كريم.. عايزين ايه؟	زبيدة
: عايزين ضرايب على الزبالين.	سعد
: عاملين ضرايب على الزبالة والتراب؟	مريم
: أبويا فين ؟	شرطى ٤
: (لمنصور) مشى قدامى يا صباغ الحمير ما دام مش حتدفع تنتسجن.	سعد
: المعلم وصل .. المعلم قسام التراب وصل.	زبيدة
: مد شويه يا معلم .. مد يا خويا.	زعتري
: يا رب سترك وجيب العواقب سليمة.	منصور
: الحقنى يا معلم قسام.	شرطى ٤
: (يضحك)	سعد
: بتضحك على ايه (للشرطى)	شرطى ٤
: بيقول الحقنى يا معلم قسام كانه امير أو سلطان.	سعد
: دا ملك الرجال .	شرطى ٤
: دا زبال.	سعد
: بيقولك ملك الرجال وظيفته زبال وتراب.	قسام
: (يدخل رجل ذو شخصية قوية حوله مجموعة من الصبيان يتحفزون للشجار)	منصور
: الحقنى يا معلم قسام .. أنا فى عرضك. (يجرى ويحتفى خلف قسام)	قسام
: سيبوه.	شرطى ٤
: ايه سيبوه دى بقى حتدفع نيابة عنه.	قسام
: ادفع ايه ؟	مريم
: ما سمعتش قال ايه عاملين ضرايب على الزبالين.	قسام
: (ينفجر الجميع فى الضحك)	زبيدة
: بتضحكوا على النكتة.. حلوه مش كده.	قسام
: دى مش نكتة.. دى حقيقة.	شرطى
: حقيقة.. حقيقة ايه؟ عايزين ضرايب على الزبالين.	قسام
: عايزين سحتوت على كل قفة زبالة بتنقلها يا قسام.	قسام
: (يضحك ويضحك الجميع معه) بس (يصمت الجميع) مين اللى قال الكلام الفارغ دا؟	شرطى ٣
: القاضى .	قسام
: بتقولوا ايه ؟ وقاضى ايه ؟؟ قاضى مين ؟	شرطى ٢
: بقى أنت مش عارف قاضى مين.. قاضى دمشق.	قسام
: والله دمشق فيها قاضى .. (يضحك .. يضحكون)	شرطى ٣
: مد قدامى يا عجوز يا طويل اللسان.	غسان
: منكم لله ضرايب جديدة حتودونى فى داهيه.	قسام
: الله الله انتم هاجين على الناس ضرايب ضرايب هى خزانة السلطان فاضية وألا ايه ؟	شرطى ٣
: لم لسانك يا قسام.	غسان
: هو كل شوية ضرايب على الغلابة كفاية بقى حرام عليكم.	شرطى ٢
: بقولك ايه يا قسام خلى رجالتك يسيبونا ويلموا الدور.. ومالكش دعوه بالضرائب والمصايب.. الوالى والى والوزير وزير والقاضى قاضى والزبال زبال.	قسام
: يا طويل اللسان.. يا كلب الأعيان علموه الأدب لما يكلم الرجال أزاى يبقى	

- أديب.. وللرجال حسيب ويقدر وزن الرجال مش بالذهب والمال لكن يقدر الرجال بالشرف.
- زبيدة : (لقسام) بقولك ايه بلاش تطول وتطول.
- غسان : انا مش ح ادفع الضرائب والأتاوه.. أنا طول النهار قاعد فى البستان كل شويه هات فاكهة للوزير فلان وفاكهة للأمير فلان.. وهات فاكهة للعسكر.. وهات فاكهة للوالى بيسكر.. وهات وهات زهقت طهقت مش ح ادفع .. ادفع فاكهة بس.. فاكهة وبس ومش ح ادفع تانى.
- الزباليين : عاش عم غسان.. عاش.
- قسام : اجدع فكهاتى فى الشام عم غسان.. انسان قلبه الطيب لينا بستان أجدع فكهاتى .. شههم وراجل وعجوز إنما حلیم.
- شرطى ٣ : قسام أنت بتلعب بالنار.
- قسام : دى العيشة فى ذل عيشة مرار.. ألعب بالنار.. ألعب بالنار.. أصلى تراب.. النار تجينى أخط عليها تراب.
- سعد : (يجذب سعد بعيداً) ايه رأيك يا سعد؟ انت دراعى وطول عمرى عاملك عيني على الولاد الشغالين تراقبهم وتخللى بالك منهم لحد يسرق بيت ويشوه سمعة الزباليين.. وكنت دايماً أمين على البيوت.
- قسام : شوف يا معلمى علمتنا لما نلم وساخة الناس نحميمهم من العرض ونصون كرامتهم لكن دول زودوها نشيل زبالة وكمان ندفع لهم بيقى لا.. دا كل أهل الشام غلابة واحنا ممكن نضربهم ونخرب بيتهم دى عساكر ورق أرزقيه.
- قسام : (يترك المعلم سعد ويمسك زعتر) تعالى يا زعتر
- زعتر : أمرك يا معلم.
- قسام : ايه رأيك فى الكلام دا اللى بيقوله سعد؟ بيقول نضربهم ونأديهم
- زعتر : أنا شايف إننا ندفع النهاردة ومن بكرة مانشيلش الزبالة يوم اتنين تلاقه إن شاء الله شهر وهما اللى حيكونا ويبوسوا ايدينا شيلوا الزبالة فنقولهم يدفعولنا .. لكن ضرب وضبط احنا ممكن نغلبهم بس احنا نربيهم بالأدب.
- قسام : طول عمرك عقلك تمام وبتحكم الكلام بالميزان وتحكم بين الصبيان.
- مريم : أبويا حر مش دافع.
- سعد : بقولكم ايه يا عسكر القاضى كل واحد ياخذ أخوه من ايده احسن يتوه ويتوكل على الله.
- شرطى ٤ : عايزين منك سبع دينار ومن منصور ٣ دينار وناخد فاكهة من البستان بدل المال يعنى نتعاون مع الناس.
- قسام : تعالى يا زبيدة.. اسكت يا سعد.
- زبيدة : ايوه ياخويا.
- قسام : (هامساً) هاتى من عندك عشر دنائير اديهم لهم.
- زبيدة : بتقول ايه ؟
- قسام : أعمللى اللى بقولك عليه.
- زبيدة : حاضر (تخرج من صدرها كيس نقود وتعد عشر نانير ذهبية) عشر دنائير.
- قسام : خد يابنى من خالتك زبيدة عشر دنائير.. سبع دنائير علينا.. وثلاث لعملك منصور وقول لعمك القاضى دول اللى معايا تحويشة عمرى ومن بكره.. أنا والرجالة مش حنشيل زبالة من قدام أى دار.. وخللى الزبالة قدام كل دار وخليها.. احنا قسام التراب سيد الرجال كلنا مفيش شيل زبالة ولا تنظيف التراب ولا تقسيم التراب من بيوت الأعيان والأمراء والقضاة والعسكر والعسس وكل الناس لحد ما تتشال الضرايب والأتاوه من على الغلابة .

(تزغرد مريم وزبيدة)

: يا فرحتى يا ابه.. عملتلنا قيمة.. عملت للناس الغلاية قية بلا ضرايب بلا خرايب.

مريم

: (يخرج رجال الشرطة ومعهم النقود.. وظلام على المسرح)



## ( المشهد الثانى )

الزمان	: بعد مرور ثلاثة أيام
سعد	: افيه.. افيه.. افيه.. افيه (يضحك) تلت تيام بس ما شيلناش الزباله والعسكر وشهبندر التجار والعيان والأمراء افيه.. افيه.
زعتري	: أهو دا الأدب من غير ضرب وخطب يا سعد.
سعد	: يا زعتري خويا .. دول عساكر ورق وأكلين تفاح.. لابسين حرير وحاطين طرايطر على دماغهم وسيوف متلمعة وهدوم متشمة كله فى الهواء.
زعتري	: ساعات العقل يبقى زينة والدراع يبقى خيبة.
سعد	: وساعات العقل يبقى خيبة والدراع زينة.
زعتري	: ساعات وساعات .. افيه.. افيه.
سعد	: هو المعلم فين؟
مريم	: (تظهر تحمل شاي) صباح الخير يا رجالة.
سعد	: صباح النور على البنور ازيك يا مريم.
مريم	: (دون اهتمام) ازيك يا سعد.
زعتري	: المعلم صحا اكيد ما دام عملتى الشاي.
مريم	: صحا وقعد وفطر.
قسام	: (يظهر) صباح الخير يا رجالة.
سعد	: صباح الفل يا سيد الرجال.. سمعت آخر نكته.. افيه افيه كله ماشى وماسك مندبل على مناخير.. افيه افيه.
قسام	: والناس عامله ايه.
زعتري	: الأغنياء بيصرخوا من الزبالين.. فين الزبالين.. افيه افيه.
قسام	: والفقراء.
سعد	: متعودين على الريحه الوحشة فعمالين يضحكوا على الأغنياء.
قسام	: والضرايب.
زعتري	: بيقولوا لسه بيجمعوها وعاملين اجتماعات على طول فى بيت الوالى.
قسام	: والقاضى
مريم	: أنا خايفة عليك يا ايه.
قسام	: ما تخفيش يا مريم.. الخوف بيدبح الرجال ويشوه الجنين فى بطن امه ربنا معانا والحق معانا.
زبيدة	: (تظهر) ما تخفيش يا مريم على ابوكى دا ابو الرجال.
سعد	: هو وليد فين؟
قسام	: وليد بعته لحد حلب يشوف لنا موضوع ابو الزناتى.
زبيدة	: الراجل دا ما بيتعلعلش من زور.. وبعته فى ايه بقى؟
قسام	: لازم الشام كلها تبقى يد واحدة ومفيش شيل زباله فى دمشق وكل الشام.
زبيدة	: يا خويا خلينا فى دمشق.. إنت عايز الشام كلها ليه؟
قسام	: ما هو انا شيخ زبالين الشام واللى اقله هنا لازم يبقى فى كل مكان.
مريم	: صح يا ايه هو دا الكلام.
سعد	: يعنى وليد سافر حلب؟
قسام	: وزمانه جاى.
وليد	: (من الخارج) يا سيد الرجال يا عم قسام.
قسام	: دا صوت وليد.

زبيدة : قال يا عم قسام.. قول يا ايه.  
 مريم : ما انتى عارفه يامه وليد بيحب يضحك مع ابوه.  
 زبيدة : عملت ايه يا ولد؟ مد قول.  
 وليد : السلام عليكم.  
 الجميع : وعليكم السلام.  
 قسام : سبع ولا ضبع.  
 وليد : ايوه يا ايه سبع بن سبع.  
 مريم : جبت ليا ايه من حلب ؟  
 سعد : عايزه ايه من حلب؟ واجبهولك يا ست البنات.  
 مريم : مش عايزة حاجة يا سعد أنا بسأل أخويا.. انت اخويا.  
 قسام : سعد زى أخوكى.  
 مريم : زى.. بس مش أخويا.  
 سعد : ماشى الكلام.  
 زبيدة : هو اخوكى راح وجه من حلب على جناح يمامه.. مالحقش يجيب لك ولا يجيب لنا حاجة.  
 وليد : انا مارحتش حلب وأنا فى الطريق قابلت ابو الزناتى ومعه ابو عيد وكانوا جايين يقولوا لك أنهم سمعوا عن اللى حصل ومش حيشيلوا الزبالة إلا لما تديهم الأوامر.  
 قسام : هم جم معاك يا أهلاً وسهلاً بيهم  
 وليد : لا يا ايه رجعوا .. هما بلغونى إن حمص وحلب معاك كمان.  
 مريم : احلى كلام يا ايه.  
 سعد : والله احلى كلام.  
 شهبندر التجار : (ينادى) يا قسام.. يا قسام.. افيه افيه.  
 سعد : افيه افيه.  
 قسام : دا صوت غريب ادخلوا يلا جوه الحريم يدخلوا جوه.  
 زبيدة : بلا حريم بلا رجال خلىنا نسمع الكلام بدل ما نتصنت على الشبابيك والبيبان.  
 قسام : ماشى يا زبيدة.. مين اللى بينادى.  
 شهبندر التجار : انا شهبندر التجار افيه افيه  
 زعتر : افيه عليك  
 قسام : تعالى يا شهبندر التجار  
 شهبندر التجار : (يدخل) السلام عليكم .. افيه افيه.  
 الجميع : وعليكم السلام.  
 شهبندر التجار : (يتجه نحو زعتر) ايه يا سى قسام.. انت زعلان من الوالى والقاضى والعسكر طيب وانا مالى انا بديلك دينار فى الشهر.. ادليك دينارين فى الشهر.  
 قسام : أصل المشكلة مش معاك يا شهبندر التجار  
 زعتر : مش انا سيد الرجال قسام.. اهو دا اللى بيكلمك (يشير الى قسام)  
 شهبندر التجار : العتب على النظر ايه يا سى قسام.. مش ع اجبك دينارين أديك فى الاسبوع دينار بس شيل الزبالة من قدام بيتى .. الست مش عارفه تنام .. والأولاد كمان.. الكل تعبنا والولد عيان.. ارجوك انا ماليش دعوه بالوالى ولا القاضى.  
 قسام : ارجوك انت ادفع لهم كل اسبوع دينار وقولهم يشيلوا الضرايب من على

- الشعب الغلبان.
- شهبندر التجار : انا بدفع كل يوم عشرين دينار غير كل حمولة خارجة وجاية.
- قسام : وانا عند كلامي.
- شهبندر التجار : انا وكل التجار نقدر ندفعك كل يوم الضرايب بتاعتك بس تنصف قدام بيوتنا.
- زعر : ايه رأيك انت تدفع لعسكر العزيز الفاطمي والوالى الفلوس ويشيلوا الزبالة؟.
- شهبندر التجار : انت بتهزر يا خينا دا العساكر مليانة ايديها بالعطور.. قلت ايه يا قسام؟
- قسام : انتم كبار البلد وبايديكم تعدلوها.
- شهبندر التجار : يعنى مفيش فايده من الكلام.
- قسام : الضرايب تتشال .. احنا نشيل الزبالة.
- شهبندر التجار : طيب يا قسام.. طيب .. افيه افيه.. (يخرج ... ويضحكون)
- وليد : شئ ولا فى الخيال.
- مريم : شهبندر التجار كبير الأعيان يجى لحدنا.
- زبيدة : هنا قدام قسام.. سيد الرجال.
- سعد : يا سلام على الزمن يا ولاد قد ايه الواحد بيحس بقيمته.
- زعر : العقل يا سعد.

(تغيير إضاءة)

## ( المشهد الثالث )

المكان :	نفس المكان.
الزمان :	بعد اسبوع.
	(ضوضاء على المسرح.. ارتباك ظهور الشرطة فى كل مكان على المسرح)
قائد الشرطة :	أين قسام التراب؟.
قسام :	اين قسام التراب (يقلده)
قائد الشرطة :	انت منعت الزبالين من تنفيذ الأوامر ودفع الضرائب وشيل الزباله.
قسام :	انا دفعت الضرائب ونفذت الأوامر ومش ح اقدر ادفع لأنى مش زى عم غسان عندى فاكهة .. تاخوده زباله بدل الضرائب.. وألا تاخدوا مقشات.
عم غسان :	(يدخل الجنود) يا قائد الشرطة كل واحد بياخد قفه علشانه زيادة عن الضرائب سمسرة.
قائد الشرطة :	اخرس انت.. جاى دورك يا عجوز.
مريم :	عيب عليك يا قائد الشرطة لما تسب راجل عجوز.
قائد الشرطة :	وانت مين يا صبية بنت غسان.
مريم :	عم غسان زى ابويا.. انا ابويا شابل وساختكم ومن غيره تعفنوا .. أنا ابويا يغيب الدنيا تبقى مالهاش أى قيمة.. زبال.. أنا أبويا قسام التراب.
قائد الشرطة :	يا سلام.. خلفت يا قسام.. بنت جميلة القوام وجميلة اللسان.
زبيدة :	خمسة وخميسة فى عينك.. خمسة وخميسة عليك.. بخروها بنتى دى بخروها.. من عين حاسد حاسود.
قائد الشرطة :	يا قسام انت مقبوض عليك .. انت أعلنت التمرد والعصيان.
القاضى :	(يدخل) ايوه انا معايا أمر بالقبض على غسان التراب.
قسام :	غسان التراب ولا قسام التراب.
القاضى :	(ينظر فى الورقة) قسام وألا غسان.. قسام.. قسام التراب.
قسام :	(يضحكون ) هو فين ؟ (نظره ضعيف)
قسام :	انا أهه.
القاضى :	انت اللى سبت الزباله قدام البيوت وخليت المدينة كريهه.. دمشق اللى ريحتها فواكه وعطور يبقى ريحتها عطن وعفن آه لو ايدى تطول رقبتهك..
	تمرد وعصيان واضراب كمان.
	يا قائد الشرطة اقبض عليه.
وليد :	ما حدش يقدر يقبض على أبويا؟
مريم :	تنكسر ايد اللى يمد ايده.
زبيدة :	قبل ما تخذوه حتخدونا معاه.. كلنا كل الزباليين.. كل الزباليين فى دمشق.
قائد الشرطة :	الله دا تمرد ؟!
القاضى :	والتمرد عقوبته الاعدام والجلد والسجن كمان.
قسام :	لا حتقبض عليا ولا حتمدنى ولا حتجلدنى ولا أى حاجة.. كل دا كلام فشكك لما تبقى قدام قسام التراب يبقى تحاسب على الكلام.
قائد الشرطة :	دا تهديد.
سعد :	(لقائد الشرطة) الراجل دا يا وليد طرشه.. قلبه قاسى.. من قصيره خد رجالك يا حبيبى والسلامة فى طريقك.
قائد الشرطة :	دا انذار يا ولد.. بتهددنى.
القاضى :	الإنذار عقوبته غرامة ميت دينار.

- قائد الشرطة : :  
القاضي : :  
قسام : :  
القاضي : :  
وليد : :  
سعد : :  
زعتري : :  
القاضي : :  
سعد : :  
القاضي : :  
زعتري : :  
مريم : :  
زبيدة : :  
قائد الشرطة : :  
قسام : :  
سعد : :  
وليد : :  
قسام : :  
القاضي : :  
زبيدة : :  
القاضي : :  
زبيدة : :  
القاضي : :  
مريم : :  
القاضي : :  
سعد : :  
وليد : :
- حا تسلّم نفسك من غير دوشه ومن غير كلام.  
وتنصف قدام دار القضاء وتنضب التراب.  
احنا قسام التراب قلنا من أسبوع ممنوع تنظيف بيت الوالى والوزير  
والعسكر لحد ما ترفع الضرايب.  
ياه دا انت دخلت فى مصيبة المصايب.. الضرايب.. الضرايب أمر هام..  
والعزيز الفاطمى فى القاهرة مستنى الجباية والذى منه على الأبواب..  
الدولة بتمشى من الضرايب.  
(ينادى) يا رجال قسام يا رجال الشام امسكوا ارواحكم فى ايد وسلاحكم فى  
ايد.. ضمموا على الشام.. حلب.. حماه.. الدلب.. حمص.. دمشق..  
السويداء.. دير الزور.. الرقة.. بيروت .. طرابلس.. كلكم يد واحد وقلب  
واحد ويا قسام التراب.  
(لقائد الشرطة) بقولك ايه ؟ لم رجالك من قصيره.  
(للقاضى) يا عم القاضى نصف دارك ودار القضاء.. وخلص الموضوع  
يعدى على خير.  
انا اشيل الزباله.  
وماله.  
انا قاضى.  
وفاضى.  
يا امه يا امه خايفة على أبويا ليسجنوه ويحبسوه ويشردونا.  
إلا أبوكى ما تخفيش  
بنتك وابنك حايتهدلوا لو ماجتش معانا.  
الكلام غير الأفعال.. ايه رأيك تنزلى نزال الرجال.. راجل لراجل كف بكف  
واللى يغلب يحكم على الثانى بأى حاجة.  
(يصفق رجال قسام بفرح) تمام  
ايوه ياللا يا قائد العسكر.  
(قائد الشرطة يرتبك)  
والقاضى ما بينا يحكم.. راجل لراجل يد ليد.  
انا ماليش فى الكلام دا؟  
ليك فى ايه يا حسرة كل اسبوع لك جوازه.. بنت حلوه وعليها تاخذ كيسين  
ذهب وتتشرف بالنسب والبنات يا خسارة تتجوز ليلة وتطلق من تانى  
ليله.. ويبقى محكوم عليها ما تتجوزش تانى لأجل تاخذ معونة بيت المال  
فى كل شهر جزية.  
الكلام دا عيب يا زبيدة.  
يا مصيبتى الراجل عارف اسمى.  
يمكن نبقى نسايب يا زبيدة  
نسايب.  
آه والله مريم بنت حلوه قوى.. هما قالولى.. بس انا شايفها احلى والله  
خلفتى يا زبيدة.  
قطيعة اتجوزك انت يا كركوبه.  
ح اتجوزك حتى ولو خطفتك بدراعى.  
شوف الراجل وعماله.. انا مستعد انا نزال الرجال يا قاضى القضاة  
على مريم.. بدراعك زى ما قلت لا خطف ولا يحزنون نزال.  
(يدخل) هى ايه الحكاية بالضبط فهمونا انتم جايبين ليه وعاوزين ايه؟

زبيدة	:	شوف الرجل العجوز مناخيره قد الكوز يتجوز يا أخى.. جتك جنازة عندك كام سنة ؟
القاضى	:	سبعين سنة بس يا زبيدة.. والرجال مش بالسن الرجال بالأفعال واسألى عنى النسوان يا زبيدة.. يا بنت ستيتة.
قسام	:	تمام الرجال بالأفعال وأنا موافق تنازل سعد على جواز مريم. (الرجال الزباليين يصيحون)
القاضى	:	(يمسك سعد بعيداً) اسمع يا سعد.
سعد	:	ايوه.
القاضى	:	انا ح انازلك كده وكده وانت تتهزم واديلك ألف دينار.
سعد	:	بس؟
القاضى	:	وحصان.
سعد	:	بس؟
القاضى	:	وحمار.
سعد	:	بس؟
القاضى	:	وجمل.
سعد	:	بس ؟
القاضى	:	وجارية روميه.
سعد	:	بس ؟
القاضى	:	باقولك ايه مفيش حاجة ت انيه تتركب كنت عطيتها لك.. كل الركوب دا فى الحلال يا ولد مش فى الحرام وأنا بحب الحلال.
سعد	:	ايه .. انت مش معقول؟
القاضى	:	قلت ايه ؟
سعد	:	موافق.. يا رجال .. اتفقنا اللى يتهزم يسلم مش كده يا قاضى.
القاضى	:	تمام.. اتفقنا على دا الكلام.
المجموعة	:	ايوه.
سعد	:	النزال لأجل مريم
مريم	:	يا ايه معقول الكلام دا.
قسام	:	ماتخفيش على سعد.. انت ليه وهو ليكى.
:	:	(يصفق الرجال تصفيقه خاصة بهم)
:	:	(يحدث النزال.. يحاول القاضى أن يقدم حركة ويصفع سعد لكن سعد ينزله بضربه واحدة فيسقط على الأرض.. فيصفق الجميع)
القاضى	:	ولد يا سعد ما اتفقتاش على كده.. (يقف القاضى) (سعد يضربه مرة أخرى)
القاضى	:	الحكاية دى وراها حكم بالإعدام على سعد لأنه تعدى على القاضى
قائد الشرطة	:	اثناء تأدية وظيفته.
قسام	:	تحب النزال تانى يا قاضى.
القاضى	:	ايوه (يمسك شرطى جانباً) يا منصور لو غلبنى .. لو غلبنى سامع خللى بالك لو غلبنى قبل ما انزل على الأرض الحقنى واطعنه .. اقتله يبقى مات أثناء مقاومته للشرطة.
سعد	:	ياللا.
:	:	(يصفق الرجال بشدة تصفيقه مميزة) (ينزل القاضى مع سعد عندما يهزم القاضى .. يحاول منصور الشرطى طعن سعد.. فيفاجأ بوليد وزعتر يمسكان به بعيداً حتى يهزم تماماً ويسقط)

سعد : هزمتك.. هزمتك.. مريم ليا.. مريم احلى صبية.  
القاضي : بالخيانة.. أوعى سيبني.. يا رجال امسكوهم كلهم.. امسكوا البنت دهييه.  
قائد الشرطة : حتشيل الزبالة دلوقت فى الحال يا قسام وتدفع الضرايب وألا حنسجك انت وعيالك ورجالك فى الحال.  
قسام : دا كلام فاضى.. اضربوهم يا رجال.  
قائد الشرطة : اقبضوا عليهم يا رجال.  
: (عندئذ يتحول المسرح إلى معركة ينتصر فيها رجال قسام التراب على رجال الشرطة ويهرب القاضي والجميع)  
( ضوء بلاك أوت - ظلام )  
( يمكن استخدام الفلاش فى المعركة )

## (المشهد الرابع)

(المتاريس فى كل ارجاء المسرح حول البيت)

(كل الرجال يحملوا اسلحة مكانس.. وبعض السيوف وحجارة وقفف)

- مريم : (تدخل تحمل أكواب الشاي للرجال.. تصل عند سعد) الشاي يا سعد.  
سعد : تسلم ايدك يا مريم (يرتشف رشفة) تسلم ايدك أما كباية شاي إنما ايه .  
مريم : ايه.. بقولك ايه يا سعد؟ انسى الكلام اللي قلته للقاضى.  
سعد : (يبتسم) انا كسبتك بدراعى ومستعد أفديكى بروحى يا مريم بس ما تتجوزيش القاضى الفاضى.  
مريم : (تضحك) انت ايه اللي عملته فى القاضى يا سعد؟  
سعد : ما عملتش حاجة يا مريم .. ضربته.  
مريم : حد يضرب القاضى يا سعد.  
سعد : علشانك يا مريم.  
مريم : قولى يا سعد.  
سعد : عيون سعد.. روح سعد.  
مريم : هو القاضى لما خدك على جنب قالك ايه.  
سعد : قالى ح اديك ألف دينار وبيت وحصار وحمار وجمل وجارية رومية.  
مريم : حيديك كل دا.  
سعد : علشان يغلبنى قدام الناس وياخدك.  
مريم : وانت سبت كل دا ليه ؟  
سعد : علشانك يا مريم.  
مريم : والجارية الرومية افرض إنها جمل منى؟  
سعد : مفيش اجمل منك لا رومية ولا هندية.  
مريم : افرض إن القلب مش معاك ؟  
سعد : مش مهم.. المهم ما يخدوكش منى.  
مريم : مين ؟  
سعد : أى حد.  
مريم : يعنى الجواز بالعافية.  
سعد : لا.  
مريم : ولو اتجوزت غيرك.  
سعد : أموت اتنين من عسكر العزيز الفاطمى واقتل نفسى.  
قسام : (يضحكان .. تسير هى فى اتجاه الرجال)  
قسام : (يتحدث مع زعتر) بعت مراسيل لجبل طرفه والزبدان تطلب كل الزعار والحرافيش تطلب معونة الزبالين والعيارين.  
زعتر : ويعتوا رجال وقطعوا الطرق على رجال الوالى وعسكر العزيز الفاطمى.  
كنش : (يدخل وفد ارتدى سلسلة فى رقبته ذهبية) سلام يا ملك الرجال.  
قسام : ايه الأخبار يا كنش.  
كنش : كله تمام  
زعتر : ايه اللي فى رقبته دا يا كنش؟  
كنش : دى سلسلة ذهب لقيتها فى رقبة عسكرى من عساكر العزيز الفاطمى.  
قسام : بتقول ايه يا كنش ؟



- كنش : انت زعلت وألا إيه يا معلمى ؟
- قسام : آمال عايزنى ازغرت وألا اتحزم وارقص واقول لرجالتى لبسوا سلاسل ذهب زى الحريم.
- كنش : ما هو كل الأمراء والأعيان لابسين سلاسل ذهبية.
- قسام : احنا مش لصوص زيهم.
- زعتري : اهدى امال يا سيد الرجال.
- زبيدة : اخلع يا ولد السلسلة.
- كنش : الله الله ما تقولوا انتم عايزين السلسلة وبلاش الشتيمة فيا.
- زعتري : السلسلة دى حتتابع حا نجيب لنا بيها سلام يا كنش وأكل لأننا محتجين سلاح وأكل.
- كنش : كده.. طيب.. انا جدع برضه وافهمها وهى طيارة.. ح انصرف واجيب لكم سلاح وأكل وابيع السلسلة ولا تزعل منى يا ملك الرجال عن اذنكم (يخرج)
- زبيدة : مالك يا قسام؟
- قسام : انا خايف يا زبيدة .. خايف رجالتى يلبسوا الحرير ويبقوا زى الأمراء والأعيان ورجاله ورقة ويتصرفوا تصرفات صغيرة زى اللى شفتيها يضيعوا.
- زبيدة : بعد الشر.. بعد الشر.. زعتري يخلى باله.
- زعتري : يا ملك الرجال انت طول عمرك محكمنى عليهم.. مخلىنى أحكم بين الزبالين.
- قسام : خايف عليك لما تشوفهم بسلاسل الذهب يختل ميزانك.
- زعتري : ولا مال قارون يخلينى اختل.
- وليد : (يدخل على المسرح يجرى) يا ابيه يا ابيه.
- قسام : خير يا وليد؟
- وليد : الوالى جاى ومعاه ألف جندى.
- قسام : ألف جندى مش مهم.
- وليد : وباعت مرسل.
- قسام : مين ؟
- وليد : اتنين عساكر شايلين علم أبيض ومعاهم القاضى.
- زعتري : اتفاوض معاهم.
- مريم : أوعك يا ابيه تنزل راسك.
- زبيدة : فشر.
- قسام : خليه ييجوا يا وليد.
- وليد : اتفضلوا يا رسل العزيز الفاطمى.
- القاضى : (يدخل ومعاه الحرس وهو يحمل علم أبيض ورايه جلد) (ينظر يجد مريم) إزيك يا مريم.
- قسام : اتكلم يا رسول العزيز الفاطمى.
- القاضى : من العزيز الفاطمى إلى قسام التراب سلم تسلم وإلا. العزيز الفاطمى (يمزق الرسالة)
- قسام : بتعمل ايه بتقطع الرسالة.
- القاضى : دى التعليمات تنقطع الرسالة بعد القراءة علشان ما يبقاش لك تاريخ يا قسام .. احسن يكتبوا إن فى يوم من الأيام بعث العزيز الفاطمى لزبال رسالة .. إزيك يا ست أم مريم وازاى المحروسة.
- زعتري : الرد يا ملك الرجال.

( تحدث معركة شرسة بين رجال قسام ورجال العزيز الفاطمي  
وتنتهى بانتصار رجال قسام التراب)  
(ستار)

## ( المشهد الخامس )

- : (يفتح الستار على قصر الوالى فى دمشق وقد ربطت ايدى الوالى فى حبل والقاضى ورئيس الشرطة)  
(وقد وقف الزبالون يحملون السلاح بدلاً من الشرطة)  
(وقسام يجلس على كرسى الوالى)  
(قسام يمسك السوط فى يده ويضرب فى الهواء)  
قسام : هو دا الكرباك اللى كنت بتضرب بيه.. مش كده يا والى دمشق؟ (يضرب الهواء)  
الوالى : أى .. أى .  
قسام : يا راجل عيب هو انا ضربتك . أنا بهوشك. دا انت والى لازم تكون جامد.  
الوالى : شوف يا قسام .  
وليد : قول عمى قسام يا طويل اللسان.  
زبيدة : ايوه قول يا ملك الرجال.  
القاضى : ملك الرجال.. دا غلط. مفيش الا ملك واحد.. خليفة واحد وامير واحد هو العزيز الفاطمى.  
مريم : يا سلام يا خويا .. آمال أبويا دا يطلع ايه؟  
وليد : هزمناكم وفرجنا التاريخ عليكم.  
زبيدة : ضربناكم وعساكركم الورق وقعت وباشت.  
قسام : بطلوا كتر كلام انت وهى وهى وهو.  
سعد : لما يتكلم عمى قسام يحلا الكلام والسلام اتفضل.  
قسام : يا متولى .. يا متولى.. (يقصد الوالى) يا متولى.  
الوالى : نعم .. متولى كده حاف من غير القاب.  
القاضى : اسمع يا قسام .. اعدل الميزان الوالى والى.. والزبال زبال..  
قسام : يا سلام . بأمانة ايه يا عرفان يا قاضى يا فسدان.. انا حاكم الشام ومفيش كلام.  
الوالى : العزيز الفاطمى .. حيز عل  
زبيدة : يا امه خوفتنى يا خويا بالعزيز الفاطمى.  
مريم : خوفتنا بالعزيز الفاطمى .. العزيز الفاطمى عليكم انتم.  
وليد : وابويا هزمنكم وهزم عسكر العزيز الفاطمى.  
الوالى : يا ناس سيونى انا وقسام اتكلم معاه كلمة رجال لوحدنا.. ارجوكم.  
القاضى : وانا عايز أكلمه فى موضوع مهم جداً يهمنى انا ومريم على انفراد.  
قسام : ما بوزش الحكم فى الدنيا الا الكلام اللى على انفراد يا إما خيانة يا إما دسياسة.. يا إما خديعة.. مش كده يا متولى.. مش كده يا قاضى.  
سعد : جرى ايه يا قاضى وأنا مالى ؟  
الوالى : ادينى فرصة اتفاهم معاك يا معلم قسام يا ملك الرجال.  
قسام : سيبونى كلكم انا ومتولى نتكلم شوية.  
زعتري : انصراف .. كله ينصرف يا جماعة .. (ينصرف الجميع من على المسرح)  
الوالى : انا الوالى مش متولى يا قسام.. اعدل الكلام علشان يتعدل الميزان.  
قسام : وانا ملك الرجال قسام.. وانت اسمك الحقيقى متولى.  
الوالى : مش مهم انا.. اسمع العيز الفاطمى حيز عل ومش حيعدى الموضوع دا على خير.

قسام : يا سلام.

الوالى : آه والله.

قسام : والنبي ايه .

الوالى : آه والله.

قسام : انت الوالى متولى بتشتغل عند العزيز الفاطمى صح ؟

الوالى : صح.

قسام : صح وألا غلط.

الوالى : صح .

قسام : ما انت شاطر ايه .. خمسة وخمسة عليك.

الوالى : انت بتهزر يا قسام.

قسام : اهزر على كفى بالذمة اللى انت جاييهم دول عساكر وألا تتأبلة السلطان؟

الوالى : انا مش قادر أصدق ان الزبالين هزموا العساكر المتدربين.

قسام : الزبالين رجال.. العسكر المتدلعين ماسكين سلاح زينة بيعملوا بيه ايه ؟.

الوالى : دلوقتى.. العزيز الفاطمى حيقلب الدنيا حيبيع جيوش حيشنقوك.

قسام : العزيز الفاطمى مش حيقبضك أول الشهر دلوقتى.. انا اللى ح اقبضك؟.. انا بس.

الوالى : لا.

قسام : ما احبش اشغل حد ببلاش.. ح اقبضك بس على قد شغلك بالمرتبات الجديدة.

الوالى : ارحمنى وسفرنى للقاهرة عند العزيز الفاطمى أبوس ايدك سفرنى.

قسام : انت عايز تسافر عند الخليفة الفاطمى.

الوالى : ابوس ايدك.. ادينى ايدك ابوسها.

قسام : بوس.. (يقبل الوالى يد قسام) بوس.. خلاص.. انا بقى مش موافق على سفرك.. أنا عايزك تشتغل معايا محتاجين لك شوية.

الوالى : أنا عايز اروح للعزيز الفاطمى فى القاهرة.

قسام : انا قلت حتشغل عندنا يعنى حتشغل عندنا. قلت حتشغل.. تقرأ لى الجوابات وتكتب لى الأوامر.. سامع وألا ح اسجنك وابهدلك زى ما كنت بتعمل.

زعتري (يهمس) ابو حيان يا ملك الرجال.

قسام : والله.. أبو حيان .. أبو حيان مين.

الوالى : ابو حيان مؤرخ الخليفة العباسى وكاتب الديوان.. الحمد لله.

قسام : انت تعرفه؟

الوالى : دا أديب كبير وكاتب كبير.. دا احسن واحد يشتغل فى كتابة التاريخ والرسائل والجوابات خده يشتغل بدالى وأنا أسافر عند العزيز الفاطمى.

قسام : لا . انت حتساعده.

الوالى : إزاي ابان قدام الناس. إزاي امشى واعيش زى أى وحد؟

قسام : يا سلام .. يعنى انت ابن تسع شهور والناس ولاد سبعة؟

الوالى : لا مش قصدى.

قسام : شوف قدامك تلت حلول.. أول حاجة تشتغل زبال وتنصف حارة العطارين.

تانى شغلانة كاتب الملك والديوان .. تالت حاجة تشتغل معلم لولاد الزبالين تعلمهم القراءة والكتابة.

الوالى : آه يا نفوخى.

زعتري : اختار وخلصنى مش فاضى لك عمنا الملك قسام.

الوالى	: مش عارف اختار ايه؟
قسام	: نادى لى ابو حيان.
زعتري	: (بصوت مرتفع) يدخل ابو حيان.
ابو حيان	: (يدخل الرجل وهو فى الخمسين) السلام عليكم ورحمة الله وبركاته
قسام	: أهلاً يا أبو حيان.
الوالى	: ازيك يا أبو حيان.. قوله يا أبو حيان.. دا انت مؤرخ الخليفة العباسى وعالم هذا الزمان. ينفع لا مؤاخذه زبال يبقى ملك الرجال ويقف قدام العزيز الفاطمى.
قسام	: يا سلام قوله يا أبو حيان قول لمتولى.. عنتر مش كان راعى غنم. وبقي أمير مش كدة يا أبو حيان.
الوالى	: بس ما بقاش ملك ولا سلطان.
قسام	: يا سلام .. أمال كان إيه وألا قوله يا أبو حيان.. فهمه حكاية عنتر مولاي قسام التراب التاريخ دايماً له أحوال غريبة وعجيبة.
أبو حيان	: مين اللى بيكتب التاريخ قولى؟
قسام	: المؤرخين.
ابو حيان	: زى أبو حيان كدة.
الوالى	: صح.
أبو حيان	: اكتب لى التاريخ بتاعى يا أبو حيان. اكتب لنا.. الزبالين هزموا الجنود وحكموا البلاد. اكتب يا أبو حيان.
قسام	: (يدخل) الشاى لملك الرجال معلنا قسام التراب والحاج أبو حيان شوية شاى إنما ايه تمام.
سعد	: حظيت نعناع يا واد يا سعد.
قسام	: نعناع طازة.
سعد	: اكتب يا أبو حيان يا مؤرخ الخليفة العباسى.. ناس داخله على السلطان كأنهم قاعدين فى حارة.
الوالى	: فيها إيه؟.. مش الوالى أو الملك إنسان.. قوله يا أبو حيان.
قسام	: الحقيقة يا مولاي.
أبو حيان	: إيه هى الحقيقة؟
قسام	: الحقيقة إن الملوك مش حيسمحوا بكتابة تاريخك مهما كان.. مهما كان.
أبو حيان	: مهما نجحت مهما حققت. لو كنت تاجر لو كنت من الجنود وألا الضباط كان ممكن لكن اسمح لى أقولك زبال مش ممكن.
الوالى	: أنا قلت الكلام دا. سامع يا سى حسان.
أبو حيان	: أنا جاى من عند الخليفة العباسى واحنا بناديك وندعمك وجاييين لك هدايا علشان تحرر هذا البلد من الفاطميين وتعلن الولاء للعباسيين.. الهدايا.
سعد	: (يصفق . يدخلون العبيد يحملون صناديق الهدايا المختلفة)
زبيدة	: يا حلاوة .. يا حلاوة..
زعتري	: (تدخل تحمل مبخرة) رقيتك واسترقيتك يا سى قسام التراب يا ملك الرجال.
قسام	: (ينظر للهدايا) ذهب .. ياقوت.. مرجان.
الوالى	: إيه دا كله.. أخذ دا كله أعمل بيه إيه؟
قسام	: (هامساً فى أذن قسام) خدhem منه واشكره.. هدايا الملوك لا ترد.
الوالى	: أنت شايف كدة.
الوالى	: ايوه.
قسام	: شوف يا أبو حيان.. أنا مش محتاج للمال ولا للمجوهرات ولا للمرجان ..

أعمل بيه إيه ؟	
يا قسام .. قصدى يا ملك الرجال. الحكاية.	الوالى
اسمع يا عم أبو حيان أنا لا بحب الذهب ولا المرجان.	قسام
أنت بقيت ملك الشام والإمارة عايزة إعداد رجال.	أبو حيان
عمر الذهب ما صنع رجال يا عم أبو حيان.. ذهب ومال إيه بس يا أبو حيان.	قسام
قسام.. قسام تعالى لما أقلك كلمة.	زبيدة
عن إذنك (ياخذها جانباً) فيه إيه يا ولية.. فى إيه؟	قسام
خد للبت حلق ذهب وخلخال وعقد علشان لما تتجوز.	زبيدة
أما كلام نسوان بصحيح جرى لك إيه يا زبيدة أعمل إيه بالذهب؟	قسام
حد يقول الكلام دا.	زبيدة
ح أبقي اشتر لها من السوق لما الأمور تتحسن شوية.	قسام
أمور إيه انت بقيت والى الشام ومسئول عن كل حاجة.. يا متولى نعم.	زبيدة
تعالى عايزك ما تروح لهاش.	الوالى
جيت.	قسام
الوالى وظيفته إيه بالضبط.. غير العبيد والجوارى الحسان والقصر الجميل دا.. بيعمل إيه بالضبط؟	الوالى
يدير البلاد.	قسام
يعنى إيه يدير البلاد.. يا غلبان دا احنا ما شلناش الزبالة تلت تيام ولا عطيناكم تراب البلد عفنت دا كلام تقولهاولى.. طيب ازاي تدير البلاد.	أبو حيان
(يدرك الحالة التى فيها) خلى الذهب عندك والفلس عندك حتعوزها ولما تعوز أى حاجة من الخليفة العباسى ابعث لنا فى الحال السلام على ملك الرجال قسام التراب.	قسام
استنى يا أبو حيان.. قوللى (ياخذها بعيداً) هى شغلانة الوالى دى صعبة.	أبو حيان
(يضحك) ما أسهل شغلانة.	قسام
ازاي.	أبو حيان
اي واحد يجيلك فى شكوى حوله على القاضى.	قسام
دا قاضى.. قاضى إيه بس.. تخيل عنده ١٧٣ عيل ويتجوز كل اسبوع بنت قد عياله ويطلقها.	أبو حيان
عارفينه . ممكن تغيره يا مولاي.	قسام
اعين غيره. زى مين .. تفتكر مين اللى ينفع.	أبو حيان
واحد جدع وفاهم وما يحبش الهار وجد فى أعماله وإذا حكم بين اتنين عدل وله عقل رزين مش متسرع.	قسام
يبقى الواد زعتر.. مفيش غيره رزين وعقله حلو.	أبو حيان
خلاص يبقى زعتر.. عن إذنك يا ملك الرجال (يخرج) (ينظر قسام إلى الوالى)	قسام
متولى الواد زعتر يبقى القاضى.	الوالى
زعتر قاضى. يا نفوخى.. يا ناس.. زعتر قاضى.	قسام
مش حرامى.. ولا كرشه حامى. ولا عقله فاضى.. وعقله يوزن بلد.. طول عمرى ابعته يحل المشاكل بين أى اتنين.. دايماً حكم فى مجلس العرب.	الوالى
بس دا مش كافى.	قسام
ما بسش.. اكتب الكلام دا فى بيان يا تعبان.	

الوالى	:	بيان من قسام التراب ملك الرجال يتعين زعتر قاضى للشام.
سعد	:	(يكتب البيان ويسلمه فى الحال لأحد الرجال)
قائد الشرطة	:	(يدخل يحمل العلم فى يديه) العلم دا.
قسام	:	العلم دا علم البلاد. إاي يدوس عليه الزبالين.
قائد الشرطة	:	الله .. انت زعلان إنهم داسوا على علم البلاد.
قسام	:	دا علم العزيز الفاطمى.
الوالى	:	غيروا العلم.
قسام	:	العلم يتغير.. يتغير إزاي.. دى الإعلام أمانة؟
قسام	:	وادوا الإعلام القديمة لمعسكر العزيز الفاطمى ما دام أمانة وقولوا للعزيز احسن له يديها للفقراء يعملوا بيها فساتين وجلابيب وحاجات تانية.
الوالى	:	ازاي البلاد تكون من غير أعلام.
قائد الشرطة	:	الشام من غير أعلام دا كلام.
قسام	:	اعملوا لنا أعلام جديدة.
الوالى	:	أعلام جديدة.
قسام	:	أيوه جديدة.. ح ارسوم علم ولا فى الخيال.. علم يبقى مالهوش مثال.
قائد الشرطة	:	ح ترسم علم ايه زباله.
قسام	:	لا وأنت الصادق.. مكنسة وقفة.
الوالى	:	(يضحك) معقول؟ علم مكنسة وقفة.
قائد الشرطة	:	(يضحك) دى نكته.
قسام	:	لا يا حبيبى أنت وهو دى حقيقة علم مكنسة وقفة.. احنا قسام التراب ملك الرجال قلنا والقول صحيح على كل بيت من بيوت الأمراء والأعيان يحمل الزباله ويرميها فى خارج المدينة.. احنا قسام التراب قلنا.. والقول صحيح نظفوا المدينة واحملوا زبالنكم من قدام الديار واكنسوا الشوارع والحوارى وامنعوا الضرانب وآه لو شفت ورقة مرمية فى حارة وممنوع أى حد يتبول على التراب واللى بيره حيتملى بالتقيلة بمية قفة تراب يردمها ويعمل بير جديد.. اكتب دا يا كاتب الديوان يا متولى يا سكران.
الوالى	:	ايه يا متولى السكران.. إيه يا متولى السكران دى انت ناوى تهزأنى.
قسام	:	مش كنت بتسكر على طول.. فى كل ليلة ودخلت لقيت الجرات مليانة خمرة فى بيتك.
زعتر	:	(يدخل مسرعاً) إيه اللى سمعته دا زعتر مين اللى بقى قاضى يا ملك الرجال.
قسام	:	انت يا زعتر.. فيه فى المملكة حد تانى اسمه زعتر؟
زعتر	:	بس أنا ما اعرفش .. ما اقدرش اتحمل المسؤولية دى.
قائد الشرطة	:	ما يعرفش دا زبال أمدى جاهل.
قسام	:	لا.. يعرف.. وبعدين هو مش أمك هو زى أبوك وبعدين الجاهل انت.
قائد الشرطة	:	اللى تشوفه يا مولاي.. أنا جاى استنذن فى الخروج للقاهرة.
قسام	:	انا عينتك مسئول الزبالين فى حى التجاريين وتجار الخيش؟
قائد الشرطة	:	انا ابقى مسئول الزبالين فى حى التجاريين وتجار الخيش؟
قسام	:	(مقاطعاً) أيوه انت بشحمك ولحمك.. امال حلقى مين غيرك.
قائد الشرطة	:	ومين يتولى الأمن.. أمن الشام.. البلد حتبقى من غير رجال شرطة.
قسام	:	سعد يتولاها.. سعد طول عمره جدع.. حرس أكياس الزباله وأمانة الزبالين.
سعد	:	انا ابقى قائد الشرطة .. دا كتير.

قسام	:	على الأقل يا سعد لما تضمن تأكل الحرامية مش حيسرقوا البلد.. لو ضبطنا توزيع الأكل مفيش حرامية.
سعد	:	والحرامية الكبار من الموظفين.
قسام	:	كل حرامى منهم ركبه حمار بالمندار وشه مكان قفاه وخليه يدور فى شوارع الشام علشان الناس ترقصه.. يتن يرقص ويتحرك لحد ما يموت.
سعد	:	وبكده نحقق العدل.
قسام	:	يا للا انصراف يا مسئول البالة فى حى التجاريين وألا تحب ترقص على عربية بحمار.
قائد الشرطة	:	لا.. اشيل الزبالة أحسن .. (يخرج)
زعتري	:	عن إذنك يا مولاي. أخذ القاضى معايا يودينى الدار.
قسام	:	آه بس على الشرطة.. هاتهلولى الأول.
القاضى	:	(يدخل القاضى) أنا واقف على الباب سامع كل حاجة . أنا موافق يا عم قسام على كل حاجة.. انت عمى والعم والد.
قسام	:	والد.. يا راجل أنت أكبر منى.
القاضى	:	انت الأكبر فى المقام.. أنا طالب إيد بنتك مريم وادفع مهرها تلت تلاف دينار.
مريم	:	(تدخل تصرخ) أوعى يا ابه تعملها وتوافق ولا حتى بعشرين ألف.
القاضى	:	وافق يا عمى ارجوك وأنا مستعد اشتغل عندك زبال .. حمار.. ادفع ثلاثين ألف دينار.
مريم	:	أوعى يا ابه أنا ح اتجوز سعد.
القاضى	:	سعد قائد الشرطة دا ما حلتوش حق البدة.. ادفع اربعين ألف دينار مهرها.
سعد	:	ايوه قائد الشرطة يا قاضى يا أبو ذمة واسعة يا حرامى.
القاضى	:	دا ظالم ما دام شرطة ببقى ظالم.. يا عمى.. "قسام" .. الشرطة دايمًا ظالمين اسألنى أنا.
قسام	:	شوف يا قاضى.. أنا ح أعينك تقسم التراب وتفتش على البيوت تشوف الحمامات وتعمل المخالفات للى يعملها فى الطريق من تبول أو...
القاضى	:	والدار والبنات والولاد والنسوان.
قسام	:	الدار حسيبها بس علشان ولادك يشتغلوا معاك فى عمل المخالفات والتفتيش على الطريق.. ونسوانك تشتغل من باقى النسوان فى غزل الصوف.
القاضى	:	موافق بس مريم.. ادبنى مريم وانا اعمل أى حاجة وادفع خمسين ألف دينار مهرها.
مريم	:	يا دى مريم وسنين مريم يا راجل شوف لك حاجة غيرى.
سعد	:	سيبيه يا مريم يتكلم على كيفه سيبيه يهو هو.. هو يا قاضى.
القاضى	:	أنا مستعد أهو هو بس ادونى مريم هو.. هو.. هو.. يلا بقى ادبنى مريم يا سعد.. مش قلت لى هو هو.. ادبنى هو هو.
قسام	:	أما راجل عينه زاغة يلا انصرف مع سعد فى الحال.
القاضى	:	ح انصرف يا ملك الرجال (يخرج مع سعد)
زبيدة	:	(على المسرح قسام وزوجته زبيدة وابنه وليد)
قسام	:	ايه يا قسام حتعمل ايه فى المال اللى لقيته فى قصر الوالى؟
قسام	:	ح اوزعه على الناس.
زبيدة	:	توزعه على الناس.



الزبالين والكناسين والشطار والحرافيش والعيارين والزعاليك والزعران والأحداث.	قسام
واحنا يا ايه ؟	مريم
احنا ايه .. العيش مخبوز والميه فى الكوز يا بنت قسام التراب .. مالك يا وليد ساكت ليه.	قسام
معقول الكلام دا يا ايه نعيش فى القصور ونشرب فى كوز ونخبز زى ما كنا فى حى الزبالين؟	وليد
ملك الرجال جانا مرسال من القرامطة.	رجل ١
خليه يدخل الحريم انصراف.	قسام
جى ايه يا راجل خليه يدخل انت حتعملهم عليا .. روحى يا مريم انتى علشان لسه صغيرة.	زبيدة
حاضر يامه بس اشوف القرموط دا.	مريم
خليه يدخل القرموط دا.	قسام
السلام عليكم ورحمة الله وبركاته.	القرموطى
السلام عليكم ورحمة الله وبركاته.	قسام
ملك الرجال صاحب العلم الجميل المكنسة والقفه.	القرموطى
شايفين القرموطى فاهم إزاي.	قسام
قرموط انما ايه لسانه بينقط عسل.	زبيدة
مولاتى زبيدة.	القرموطى
يا حلاوتك يا جمالك خليت للحلوتين ايه .. قولها تانى سمعنى مولاتى زبيدة.	زبيدة
مولاتى زبيدة التى ساندت ملك الرجال قسام التراب الذى سيحقق العدل مثل دولة القرامطة ويلغى الثراء	القرموطى
لا أنا عايز ألغى الفقر مثل الغنا .. انا عايز كله غنى كله بيكسب ياكل .. كله بيشررب .. كله يسكن.	قسام
دى مكنسة من ذهب وقفة من ذهب صغيرين حلوتين.	القرموطى
سلطانكم دا راجل جدع كان بيشتغل إيه قبل ما يبقى سلطان؟	قسام
ما هو ابوه كان سلطان.	القرموطى
قصدى جده الأول.	قسام
سلطان.	القرموطى
الأولانى خالص.	قسام
كان صياد.	القرموطى
اعملوا سمكة من ذهب وأهدوها للسلطان القرموطى أتاريه قرموط.	قسام
شكراً يا ملك الرجال .. (ينظر ناحية مريم)	القرموطى
الأميرة مريم .. مولانا الأمير عايز يخطب مريم لابنه على .. عنده ٢٥ سنة وابن سلطان القرامطة.	
يعنى حتاكلنى سمك على طول ببلاش.	وليد
يا دمك يا أخى وانت غلّس كده.	مريم
(تزغرد) يا حلاوة يا مريم السلاطين جايين يخطبوكى.	زبيدة
بتزغرتى على إيه يا امه.	مريم
ودا سيف ذهب للأمير وليد.	القرموطى
دا عبيط ما يعرقش يمسك سيف لكن بيضرب بعصا المكنسة أحسن من عشرين سيف.	زبيدة
يا أمه اسكتى شوية متشكرين (يمسك السيف)	وليد

القرموطى	:	(يقدم صندوقاً مليئاً بالعملة) احنا عملنا عملة جديدة ع ليها صورتك وكتبنا
قسام	:	تحتها قسام يا شديد. يالى اقوى من الحديد.
القرموطى	:	فلوس عليها صورتى ومكتوب تحتها الكلام دا.
قسام	:	مش مصدق أهه .. (يفتح الصندوق والأولاد والزوجة يفرحون بالعملة)
القرموطى	:	أما انكم قراميط بصحيح عاملين حساب كل حاجة بالتمام والكمال.
قسام	:	امر ملك الرجال.
القرموطى	:	روح شوف لك نومه.
قسام	:	بتقول ايه يا مولاي؟
القرموطى	:	بقولك روح نام وفوت عليا بكره.
قسام	:	(تهمس فى أذنه) قسام.. اسمع.. شوف الرجل متولى يدبر له نومه.
قسام	:	يا متولى .. يا متولى يا زفت.
الوالى	:	نعم (يدخل)
قسام	:	نعمة تترفصك.. اسمع.
الوالى	:	نعم.
قسام	:	الراجل دا ضيف خده نيمه وريحه واستضيفه فى بيت الضيوف يا حلوف.
القرموطى	:	الراجل دا بتشبه عليه . يشبه مين .. مين ؟.
الوالى	:	الراجل دا بتشبه عليه .. مش فاكرنى.
القرموطى	:	يخلق من الشبه أربعين تشبه الله يحجمه مطروح ما راح الوالى السكران
	:	التعبان.. سارق الأمن والأمان.
قسام	:	القاتحة على روحه.
الوالى	:	اتفضل قدامى.
القرموطى	:	عن إذن مولاي.. (يخرج)
مريم	:	ايه يا ايه.. حتجوزنى لابن سلاطين القراميط ؟
زبيدة	:	حقه يا مريم حتبقى أميرة.
مريم	:	لا يا أمه.. لا.. أنا اخترت سعد من زمان وأبويا عطاله كلمة مش كده يا
	:	ابه؟ ساكت ليه؟ ما تتكلم.. ؟ أوعى يا ايه تبغنى ؟
زبيدة	:	يبيعك ايه يا خايبه دى جوازة من ابن سلطان.
مريم	:	يا ايه انت ساكت ليه .؟
وليد	:	ابوكى بيفكر.
قسام	:	حاجة تحير.
زبيدة	:	لا تحير ولا تغير ايش جاب سعد الكحيان لابن السلطان ؟
مريم	:	سعد يا أمه قائد الشرطة.
زبيدة	:	بلا خيبة دى حنية قلب أبوكى هى خلته كده.
وليد	:	صح يا أمه بس سعد دا يا امه طول عمره معانا ايد بأيد.
زبيدة	:	ورجل برجل ورأس برأس.. إيه يا واد الكلام الخايب دا؟.
مريم	:	يا أمه وليد كلامه مش خايب.
زبيدة	:	هو لولا كلامه مش خايب كان حب أخت زعتر.
مريم	:	ماله زعتر دا قاضى.
زبيدة	:	بنت انتى.. انتى ناسية إنتى بنت مين؟
قسام	:	(يدخل) بنت مين؟ يا زبيدة قولى لها.
زبيدة	:	بنت قسام التراب ملك الرجال اللى تخطب وده السلاطين وحاكم بلاد الشام.
قسام	:	بس قسام التراب دا زبال والعلم اللى قدامك ده عليه المكنسة والقفة
	:	علشان ما تنسيش أصلنا يا زبيدة.. سعد جوز بنتك مريم مهما جرت الأيام

والواد حاجوزه اخت زعتر واحنا زى ما احنا زبيدة وقسام.	زبيدة
: والله ما انا قاعده لكم راح امشى واسيب لكم الديوان (تخرج)	مريم
: يا أمه.. يا أمه (تجرى خلفها)	وليد
: يامه.. يامه.. (يخرج) . (يخرج بمفرده على المسرح)	الشاعر
: (يدخل مسرعاً) أنت شمس يا مولاي.	قسام
: انت مين يا حرامى.	الشاعر
: انت قمر .. انت فجر للحياه.	قسام
: انت حرامى.. انت ازاي جيت هنا.	الشاعر
: أنا شاعر يا مولاي.. على بابك اقف منذ ثلاثة أيام.. لا طعام.. لا شراب..	(يبكى)
: بتشتغل ايه يا ابني؟	قسام
: شاعر يا مولاي.	الشاعر
: ما انا عارف شاعر . شاعر بايه ؟	قسام
: شاعر القوافي وفارس الكلمات.	الشاعر
: وحياة أبوك أقف معوج واتكلم عدل.. بتشتغل ايه ؟ نجار.. حداد.. عطار.	قسام
: شاعر الملوك وانت سيد الملوك اجمعين.. انت. انت ملك الزمال ما مضى	الشاعر
منه وما هو آت.	قسام
: أبوك السقامات.. يا بتاع التلت ورقات.. علقوه على خازوق.	الشاعر
: أبوس ايدك يا مولاي سامحنى.	قسام
: اختار لك شغلانة يا نجار يا حداد يا عطار يا زبال.	الشاعر
: اصنع العطور فأنا أعشق الجمال.	قسام
: احسن برضه.. اشتغل علشان تاكل وتبطل كلام.. مع السلامة انت اسمك	الشاعر
ايه يا ولد؟	قسام
: خادمك يا مولاي.. حسن.	قسام
: ماشى يا حسن.. أوعك الفاء بتشتغل فى التلت ورقات وتذويق الكلام .. ح	قسام
اجلدك (يخرج مهرولاً)	قسام
: يا زبيدة .. يا زبيدة انتى فين (يخرج)	قسام
(يدخل على المسرح عم غسان)	
: مش معقول الكلام دا.. هو فين قسام ؟ .. فين قسام ؟	غسان
: إنت جيت لحبيبك يعنى.	الوالى
: الله بتعمل ايه هنا ؟	غسان
: بشتغل عند حبيبك الزبال.	الوالى
: ما عدش حبيبى .. قال إيه عايزنى أطلع زكاة المال فاكهة مال وأوزعه	غسان
على الفقراء والجيش وقال إيه أشغل الناس بالمال مش بالطماطم دا كلام.	
فيها إيه لما الناس تشتغل بالوجبات ماله ومالنا؟	
: (ينظر خلفه) دا زبال يا غسان.	الوالى
: لك حق.	غسان
: أنا أبقي كاتب.	الوالى
: فين أيامكم تاخده فاكهة بدل الضرايب.	غسان
: احنا مش ساكتين على اتصال بالعزیز الفاطمى.	الوالى
: والله يا ريت يرجع العزیز الفاطمى.	غسان
: القاضى وأنا وشهبندر التجار بنعمل اجتماعات كل يوم جمعة فى المساء فى	الوالى

ديوان شهيندر التجار بنبت رسايل للعزير الفاطمى.	
: وأنا معاكم.	غسان
: قال إيه مش عاجبه كل حاجه ؟	الوالى
: مش ممكن يفضل الحال على ما هو عليه؟	غسان
: مش ساكتين له ؟	الوالى
: (يدخل) دا عقل الستات وأفكار ستات.. (ينظر يجد الوالى وغسان) خير فى إيه يا عم غسان.	قسام
: مفيش .. كان بيمدح فيك.	الوالى
: اسكت انت يا متولى .. فيه إيه يا عم غسان ؟	قسام
: كنت جاى أسأل عليك.	غسان
: الله إنت اتعلمت من متولى تدارى الكلام يا عم غسان ماشى.. أهلا بيك.	قسام
: بتقول عقل ستات وأفكار ستات.. خير فيه إيه ؟	غسان
: أصل امبراطور الرومان بعث لى خدية شوية نسوان جوارى فكره إنى فاضى للنسوان .. هو اللى يتجوز زبيده يفكر يتجوز تانى (يضحك)؟	قسام
: ها ها .. نكتة جميلة.	الوالى
: زبيدة ست طيبة.	غسان
: وامبراطور الروم عايز إيه ؟	الوالى
: الله.. إنت بتدخل فى اللى ما لكش فيه.	قسام
: (يدخل مسرعاً وخلفه زبيدة) الحقنى يا مولاي الحقنى يا مولاي.	الرومانى
: جايب له نسوان .. راجل طويل عريض وجايب نسوان.	زبيدة
: كفاية يا زبيدة كفايه.	قسام
: والبنات اللى بيعتهم لك ملك الروم هديه.	زبيدة
: جوارى مهلبية .. (يدخل وليد ومريم)	الرومانى
: يا ابيه أمة عملت فى البنات الروميات حتة عمله.	وليد
: أخذتهم وضربتهم علفة وبعتهن للحمام يشتغلوا فى تنظيف نسوان الزبالين.	الرومانى
: أوعك تغلط فى نسوان الزبالين؟	مريم
: هو أنا غلط؟	الرومانى
: انا مش قادرة أقف قدام الراجل دا.. أنا ماشيه (تخرج).	زبيدة
: (يضحك) حلوه يا زبيده استنى استنى.	قسام
: وفين الحلاوة فى كده يا مولاي.	الرومانى
: تبقى بتغير عليا زبيدة بتغير عليا.	قسام
: (يهمس) ح أخلى مولاي بيعت لك عشرينجاريه.	الرومانى
: يا بنى هو أنا قادر على واحدة لما تجيب لى عشرين وألا أقولك خليه بيعتهم يمكن اختار واحدة منهم للزمن.	قسام
: يا ابيه أقول لأمة ؟.	مريم
: ما تقوليها حتخوفينى من أمك.	قسام
: لا يا ابيه .. بس تدخل ستات غريبة هنا.. أنا زعانة هه (تخرج).	مريم
: مظبوط .. عن إنك يا أبة.	وليد
: عارفك عايز تروح تدور على البنات الروميات.	قسام
: يا متولى يا زفت خد عم غسان وامشى وسبنى مع مندوب الإمبراطور الرومانى.	
: حاضر.. حاضر.	الوالى

قسام	:	ما تتصنّتش على الباب.
الوالى	:	أمر مولاي. (يخرج)
غسان	:	أمر مولاي. (يخرج)
	:	(يبقى قسام والرومانى)
الرومانى	:	انت ليك أعداء يا قسام التراب ومؤمرات داخل وخارج البلاد واحنا لينا عيون ونقدر نساعدك.
قسام	:	تساعدنى فى ايه.
الرومانى	:	نمد لنا بجيش تهزم بيه العزيز الفاطمى.
قسام	:	جيش ايه؟
الرومانى	:	جيش رومانى عظيم يساعد تهزم بيه العزيز الفاطمى وخليفة العباسيين وملك القرامطة. وتبقى أنت امبراطور الدولة العباسية (الكبرى) إحنا أصدقاء وفيه غيرك يتمنى اننا نساعدوهم فلوس يدوها لنا لكن انت تهمننا نديك فلوس ومال ورجال وفرسان تهزم جيرانك.
قسام	:	يا نهار أسود وليه أنا استعين بالروم واقتل العرب والمسلمين؟
الرومانى	:	علشان تبقى امبراطور العرب والمسلمين.
قسام	:	انا ابقى زبال فى أى مكان عند أى حاكم عربى حتى ولو كان الوالى متولى ومياقش امبراطور تحت سيف رومانى يقتل أهلى واخوانى.. روح امشى اغلقوا الديوان (يمشى).

### ( المشهد السابع )

- مريم : (مريم ووليد على المسرح بمفردهما)  
وليد : انا رايحه أشوف أمى (تخرج)  
ليلي : طيب .. (يجلس على كرسي العرش)  
ليلي : (فتاة فقيرة أخت زعتر تدخل القصر على استحياء)  
وليد : ليلي .. انتى جيتى أخيراً للديوان.. ليلي يا وردة البستان .. يا حلمى الجميل.  
ليلي : أيوه جيت يا سى وليد.. ما تكسفينيش بقى بالكلام الجميل.  
وليد : أهلاً يا ليلي .. لو كنتى تعرفى قد إيه أنا..  
ليلي : (مقاطعاً) أخويا زعتر قالى روحى كلمى عمك قسام التراب عايزك فى القصر ضرورى.  
وليد : دا القصر نور .. والحق نور..  
ليلي : بصراحة خفت يا سى وليد من القصر  
وليد : ما هو أخوك عايش فى قصر.  
ليلي : ما هو بصراحة يا سى وليد قصر عن قصر يختلف.. القصر دا كبير  
وليد : معاكى حق اتاريهم عايشين فى قصور وسايبيننا فى خيام.  
ليلي : عمى قسام هنا؟  
وليد : طالع ينام شويه وزمانه جاى.  
ليلي : طب اروح أنا وأفوت أشوفه بعدين.. أصل أخويا قالى إنه عايزنى ضرورى؟  
وليد : جرى إيه يا ليلي مالك مكسوفه منى ليه؟ ومستعجلة ليه؟ احنا من زمان ما تكلمناش.  
ليلي : سنتين يا سى وليد واحنا بنحارب عسكر العزيز الفاطمى وسنتين واحنا مش عارفين ليلنا من نهارنا.. أربع سنين فى حرب وضرب.  
وليد : بس احنا بقت الشام ملكنا يا ليلي.  
ليلي : يا ترى حتفضل حياتنا كده مش عارفين ليلنا من نهارنا؟  
وليد : أبويا بيقول هانت وكل الأمور حتوضح.. زعتر اخوكى مبسوط؟  
ليلي : زعتر (تضحك) الله ينيله قال الجعان يكتب طلب والعريان يكتب طلب وخلقى العسكر تلف على المدينة تجيب الشكاوى وخلقى شهبندر التجار يوزع الزكاة قماش على الغلبانين.  
وليد : زعتر جدع.  
ليلي : بس عيبه الوحيد ما بيعرفش يقرأ ويكتب.  
وليد : يعنى استفدنا إيه من الله بيقراوا ويكتبوا خربوها.. وجابونا ورا وسرقوا الناس.  
ليلي : معاك حق يا سى وليد ما تعرفش عمى قسام عايزنى ليه؟. والنبي لتقولى يا سى وليد احسن قلبى فى رجلى مش عارفه اتلم على جتتى من ساعت ما أخويا قالى.  
وليد : ابويا وافق يا ليلي .. وافق على جوازنا خلاص.  
ليلي : معقولة .. صحيح .. عمى قسام وافق على جوازنا .. ومين قالك إنى ح أوافق عليك (بدلال)  
مريم : (تدخل) إيه دا القمر عندنا أهلاً يا ليلي.  
ليلي : (تحضنها) أهلاً يا مريم وحشائى يا بنت عم قسام.

- مريم : جرى ايه يا عروسه .. جرى ايه يا عريس مش تفرج عروستك على القصر.
- ليلي : بصراحة انا مكسوفة قوى منك يا مريم إني ما جتش لكم من سنتين .. شغلتنا الحرب والضرب وهموم الناس وفرح الناس كل واحد نسي نفسه كلنا بنحلم وكلنا مشغولين.
- مريم : ياللا بينا قدامي وبطلت دلح البنات دا.. قال مكسوفة قال.. ياللا يا وليد تعالى معانا نفرج ليلي على القصر زى ما بنحلم مع كل الناس من حقنا نحلم شويه.
- وليد : ياللا بينا .. (يخرجان)
- زعتري : (يدخل القاضي وزعتري) (القاضي فى حالة رثة يحمل الأوراق بينما زعتري تحسن قليلاً فى ملبسه ولكن الملبس ليس فاخراً)
- القاضي : عم قسام بعث لى يا ترى فيه إيه؟ فيه حد اشتكى له أكيد.
- القاضي : الشغل من الساعة كام للساعة كام فهمنى؟ تعبتنى .. ما هو أنا لازم أعرف الشغل من الساعة كام للساعة كام؟ مش طول النهار ألف وراك فيه ايه يا أخى..؟ أنا راجل كبير عيب يا زعتري.
- زعتري : ميت مرة أقولك القاضي زعتري يا كاتب القاضي.. وميت مرة أقولك علمنى القرابة والكتابة تطنش ولو انت قاضى عادل ما كنتش ألقى كل المشاكل دى فى البلد.
- القاضي : حاضر.. حاضر يا قاضى زعتري (لنفسه) امتى تيجى ياللى فى بالى وتخلصنا من اللى احنا فيه؟
- زعتري : يا ترى عم قسام عايزنى فى إيه؟
- القاضي : عايزك فى كل خير.. يمكن حيغير الوزراء والمناصب.
- زعتري : دا حتى قالى إبعث لى اختك ليلي.
- القاضي : هى الست ليلي هنا ؟ جايز تبقى وزيرة وبيفكر يعمل وزارة أول مرة أشوف بلد من غير وزارات .. هى الست ليلي هنا؟
- زعتري : ايوه يا اما جات يا اما حتيجي.
- القاضي : بالمناسبة دى اسمح لى يا عمى القاضي زعتري أن أتقدم فى طلب.
- زعتري : (بدهشة) ايه يا عم القاضي زعتري جديدة دى.. على ودانى.. فيه ايه اتكلم بسرعة.. انا عمك القاضي زعتري.
- القاضي : ما تلخبطنيش بالمناسبة دى اسمح لى يا عم القاضي زعتري إني اتقدم لك فى طلب أيد اختك ليلي.
- زعتري : يا نهارك مش فايت إنت اتجننت يا راجل انت.. دى البنت تيجى قد أحفادك .
- القاضي : احفادى مين.. يا عم الراجل ما دام بصحته يبقى خلاص.. عندك قسام التراب مثلاً إبنه عمره ١٨ سنة وهو ٣٦ سنة .. دا ليه لأنه اتجوز وهو صغير.
- زعتري : دا قانون وزمان الزبالين البنت تتجوز سنها ١٦ سنة والواد يتجوز ١٨ سنة.
- القاضي : انا بقى اتجوزت عمرى ١٢ سنة.
- زعتري : يا شقى.
- القاضي : آه والله لما شافنى بقيت راجل وأنا عندى ١٢ سنة قال جوزة حالاً.
- زعتري : ومن يومها نازل جواز.. ارحم بنات الناس ربنا يخرب بيتك.
- القاضي : ما هو اتخرب على ايد الزبالين.. قصدى على ايديكم. قصدى اتخرب والسلام.

- قسام : (يدخل قسام التراب) ايه يا قاضى جيت ليه؟  
القاضى : نعم.  
قسام : (ينظر له بدهشة) هو انت قاضى.. انت قاضى.. أنا بقول يا قاضى.. يا أبو عقل فاضى للنسوان والكلام الفارغ.  
زعتري : نعم.  
قسام : انا طالب أيد اختك ليلى لإبنى.  
القاضى : نعم بتقول إيه؟  
قسام : اسكت يا راجل يا غلباوى.  
القاضى : سكت .  
قسام : طالب أيد اختك ليلى لإبنى وليد.  
القاضى : (يبكى)  
قسام : بيعيط ليه دا.. بدل ما تقول مبروك تعيط وتبكي أما راجل عديم المفهومية.  
زعتري : دا شئ يشرفنى يا عمى قسام يا ملك الرجال.  
زبيدة : (تدخل تزغرد) مبروك.  
ليلى : (تدخل مع وليد ومريم)  
قسام : اكتب يا قاضى الكتاب.  
زعتري : اكتب يا كاتب.  
القاضى : (يبكى) حاضر.. حاضر.. حتى أنت يا ليلى رحتى منى.  
قسام : الله هو انت بقالك سنتين ما تجوزتش جوازه جديدة علشان كده.  
قسام : (يقلب المسرح الى فرح وزفاف.. يتحول الديكور مع نهاية الأغنية الى قصر العزيز الفاطمى)
- العزيز الفاطمى : التاريخ حيقول ايه من ٣٦٥ لسنة ٣١٣ هجرية حكم الشام زبال اسمه قسام التراب.. دا كلام يا رجال.. عيوننا فى الشام بتقول أنه ملك قلوب الناس وماليهم إحساس.. والى متولى طالب فلوس على طول علشان يشتري لنا أعوان.  
ابن الصمصامة : يا مولاي العزيز سبع سنوات بسبع حملات كل حملة بتهزم.  
العزيز الفاطمى : ٧ سنين وعلم الشام مكنسة وقفه دا انسان غريب.. يا ابن الصمصامة دا بيقد ياكل فى الأسواق.. مع مبيضين النحاس والعطاريين والسقايين.  
ابن الصمصامة : والغريب يا مولاي .. والعجيب يا مولاي عمل السيوف شكل المقشة والدروع شكل الفقة.  
العزيز الفاطمى : أقول ايه قدام التاريخ العزيز الفاطمى فرسانه بتحارب زبالين.  
ابن الصمصامة : يا مولاي بيحكم البلد من غير وزارة ولا بيعرفش يفك الخط.  
العزيز الفاطمى : ايه رأيك يا ابن الصمصامة.  
ابن الصمصامة : الراى رأيك يا مولاي العزيز.  
العزيز الفاطمى : يكون جيش أكبر من الجيش اللى فتحنا بيه مصر وانت تبقى قائد الجيش وتفتح الشام وتدخل دمشق وتجب لى قسام التراب حى مش ميت لأنه لو مات حيثحول لرمز وثورة شعبية ولازم تفوت عليه الفرصة دى.  
ابن الصمصامة : الجيش دا يا مولاي حيثكون فى يده.  
العزيز الفاطمى : حتى ولو.  
الحارس : (يدخل) مولاي .. مولاي .. رسول يا مولاي من عيوننا فى الشام.  
العزيز الفاطمى : يدخل قوام.  
الرسول : يا مولاي الثورة قامت فى بغداد والعراقيين قاموا بثورة على الخليفة



العباسى وفشلت ورجعت بغداد للخليفة العباسى ورئيسهم هرب.  
: عند عند قسام التراب والخيفة العباسى طالب راسه فى بغداد.  
: احنا الفاطميين ومعنا حنقضى على قسام التراب ونعدل الميزان ما بقاش  
اللا الزبالين .. يحكموا البلاد.  
الرسول  
العزیز الفاطمی

## ( المشهد الثامن )

- الزمان : ٣٧٣ هـ
- المكان : (أحد الشوارع في دمشق) بجوار بستان صناديق زبالة في كان حوالى  
عشرين صندوقاً مليئاً بالقذارة .. ابن الصمصامة ومعه جنوده.
- ابن الصمصامة : فتشوا كل البيوت .. كل الحواري .. كل شبر .. قسام التراب لو غاب -  
العزیز الفاطمی حیدبنا هاتوه لو متصاب بس حی .. لو اتصاب عالوجه  
واشفوه وهاتوه سليم.
- جندی ١ : یا سیدی القاضی کل الحتت فتنناها.
- ابن الصمصامة : أكید لسه حی.
- جندی ٢ : دورنا فی کل مکان.
- ابن الصمصامة : أما راجل غریب .. راجل عجیب .. سریره من خشب ومرتبة طین وبطانية  
تعبانة من صوف الغنم.
- جندی : قسام التراب اتهمز یا سیدی اتهمز علی اید القائد الفاطمی الکبیر ابن  
الصمصامة دا اللی حیکتبه التاريخ.
- ابن الصمصامة : طبیح إیه ؟
- جندی ٢ : یقول تاریخ الشعوب.
- ابن الصمصامة : فکرتونی بالتاریخ أى حاجة تلاقوها مکتوب فیها تاریخ عن قسام التراب  
احرقوها.
- جندی ٢ : إزای ؟
- ابن الصمصامة : إزای یفضل تاریخه .. دا کابوس وانتهی مفیش حاجة اسمها قسام التراب  
ولا الحرافیش ولا الاحداث ولا الزعران.
- جندی ٢ : ولا الشاطر دول مش ناس دول راع .. مضبوط.
- ابن الصمصامة : اعلنوا فی کل البلاد خمسين ألف دينار ذهب فاطمی للی یقبض علی قسام  
التراب حی ویسلموا لنا.
- جندی ٢ : احنا فتننا دمشق کلها فاضل البستان دا.
- ابن الصمصامة : فین صاحب البستان ؟
- جندی ١ : (یدخل معه غسان) اهه یا مولای .. فتننا البستان .
- غسان : أهلاً بقائد عسکر وجنود العزیز الفاطمی ابن الصمصامة .
- ابن الصمصامة : ابن الصمصامة .
- غسان : ابن الصمصامة یا تعبان.
- ابن الصمصامة : أنت غبی.
- غسان : انا مش صبی أنا عجوز ما انت شایف .. لا حیلتی عیل ولا حیلتی تیل.
- ابن الصمصامة : احنا عایزین یا .. انت قولت لی إنت اسمک إیه ؟
- غسان : یا ریت کان لی ولد زیه ؟
- جندی ٢ : (یخرج سیفه) بتقول إیه ؟
- غسان : مش عارف هو مات واللا حی .. کان صاحبی لما کان زبال وکان عدوی لما  
بقی سلطان.
- ابن الصمصامة : اسمع یا غسان لو لقیته حی حندیک خمسين ألف دينار ذهب سامع وأی حد  
یلقاه حی حندیله خمسين ألف دينار.
- غسان : سامع یا مولای القائد (یخرج القائد)
- جندی ١ : اعلان .. اعلان یا أهالی دمشق الفیحاء اعلان اعلان خمسين ألف دينار للی  
یقبض علی قسام التراب حی .. اعلان اعلان من قائد السلطان العزیز

الفاطمي ابن الصمصامة خمسين ألف دينار ذهب للى يسلم قسام التراب	
حي.	
(يخرجون جميعاً .. الجنود وابن الصمصامة ويظل غسان على المسرح	قسام
الذى يخرج صفارة يصفر.. فيخرج من صناديق الزبالة قسام التراب).	غسان
ايه مشيوا.	قسام
مشيوا يا قسام.	غسان
خد العقد الماسى اللى بعته الخليفة العباسى هدية.	قسام
ادبنى وفيت وعدى وفيت العطية.	غسان
كل دا جيش جاييه العزيز الفاطمي .. كل ما تموت فيه تلاقى ميتين.	قسام
دا جيش أكبر من الجيش اللى فتح مصر.	غسان
وكل دا ذهب جايينه معاهم.	قسام
رشوه بيرشوا الناس بالذهب بتشتري الرجال والدول الكبير له تمن	غسان
والصغير له تمن.	
احسن مكان نستخب فيه برميل الزبالة فكرة جميلة مش كده.	قسام
قوى يا قسام عندك ماس كمان وأنا أعمل اللى انت عايزه.	غسان
(يدق على جنب غطاء الزبالة الثانى) (تخرج زبيدة)	
زبالة يا قسام تخبيني فى صندوق زبالة.	زبيدة
ما هو الزبال لما يستخبي حيستخبي فى قزازة رحيه واللا فى سبت تفاح.	قسام
فين وليد .. يا وليد .. يا وليد.	زبيدة
(يخرج وليد من صندوق زبالة آخر) ايوه يا أمه انا أهو .. فين ليلى يا	وليد
ليلى.	
(تخرج ليلى من صندوق الزبالة) أيوه يا وليد أنا اهه .. دنا حامل يا وليد	ليلى
تخلينى فى صندوق زبالة فين زعتر وفين سعد؟	
صندوق الزبالة (يضحكون)	سعد
نمت وجالك نوم.	زبيدة
يا سلام الواحد ينام فى صندوق الزبالة.. وهو يشم ريحة حلوه وجميله	زعتر
والله زمان.	
راحت السكره وجت الفكرة.	قسام
أنا خايف إن الأمور تخيب وما تصيب.	غسان
(ضوضاء)	
صوت من البعيد.	غسان
ياللا بينا كل واحد يستخبا	سعد
(يختبئون فى صناديق الزبالة) (يدخل الوالى والقاضى)	
يا غسان.	الوالى
نعم.	غسان
قسام التراب خلاص وأنا عايزك بكره تبعت لى التفاح الجميل والفاكهة	القاضى
اللذيذة .. ترجع زى زمان وأدينا ريحانك منه ومن قرفه.	
هو أنا ما قلتكوش.	غسان
ما قلتش إيه ؟	الوالى
مش ابن الصمصامة القاعد الكبير جه فتش البستان وقالى حيدنى خمسين	غسان
ألف دينار ذهب لو لقيت قسام التراب.	
(يحاول أن يسير .. يعد زعتر ويجذبه جلبابه) ايه دا فيه حد بيشدنى من	الوالى
هدومى .. فيه حد غريب هنا.	

غسان	: حد مين .. دى صناديق زباله البستان.
الوالى	: أنا مش عايز غير الواد سعد إيدى تطوله.
القاضى	: وانا عايز الواد زعتر أشوفه.. أشوفه بس.
الوالى	: (يخرجان سعد وزعتر من صناديق الزباله يخرجوا لسانهما من خلفهما)
سعد	: لو شفت الواد زعتر ح أقطعه حتت وأرميه للكلاب والقطط.
زعتر	: (يقلد الكلب) هو هو.
الوالى	: (يقلد القطط) نونو .
	: أنا عايز اخلص تارى منهم.. أنا الوالى متولى لازم يعرف مين الوالى متولى.
زعتر	: طز.
الوالى	: بتقول إيه (لغسان) طز.
غسان	: ما قلتنش حاجة ؟ والله ما قلت حاجة.
الوالى	: (للقاضى) سمعت اللى سمعته .. طز.
القاضى	: سمعت حاجة زى طز.. بس شامم ريحة مريم.
غسان	: شامم ريحة مريم بنت قسام.
القاضى	: ايوه مريم بنت قسام هنا.
غسان	: هنا مين ؟
القاضى	: (يشم مثل الكلب حتى يصل لصندوق الزباله) هنا.
غسان	: (يضحك وهو خائف) دا صندوق زباله فيه جتت وايد ورجول العسكر اللى ماتوا.
القاضى	: يا لطيف (يبتعد .. تضحك مريم)
القاضى	: ضحكة مريم.. سمعتها.
الوالى	: ايوه دى ضحكة مريم.. سمعتها.
القاضى	: مريم يا حبة القلب .. يا روح فوادى وهوأى.. مريم يا مريم.
غسان	: ضحكة إيه.. حد قادر يضحك فى دمشق لما أدخل أعمل لكم شأى.
الوالى	: استنى عندك أنا ح افتنش البستان بنفسى صوت زعتر قال طز وضحكة مريم .. أنا ح افتنش أنا والقاضى الظاهر أنت بنشغل مع اللى يدفع أكبر يا غسان يا بخيل يا عميل.
القاضى	: ادخل انت وأنا ح أقف هنا علشان ما حدش يهرب منك لو طلوعوا ح أمسكهم.
الوالى	: دا كلام مظبوط.. ياللا قدامى يا غسان (يدخل غسان ومعه الوالى) (يظل على المسرح القاضى بمفرده)
القاضى	: آه لو شفتك يا سعد أدبحك واطلق مريم واتجوزها (تتحرك الصناديق بالزباله فيفزع القاضى)
سعد	: (يخرج من صندوق الزباله) مش حتقدر تتجوزها يا قاضى.. ومش حاظلقها اشهد أن لا اله الا الله واشهد أن محمد رسول الله.
القاضى	: مين سعد ؟
سعد	: أخرس.
القاضى	: انت حى (يفتح صندوق الزباله الآخر تخرج مريم) حاقتك واتجوزها ارملة.
مريم	: مش حتقدر تتجوزنى ؟
القاضى	: مريم .. مريم أبوكى اتهزم وهرب وأنا عايز اتجوزك على سنة الله ورسوله.
قسام	: (يخرج قسام) جالك الموت يا خاين خنتنى.. يا قاضى إنت والتجار والوالى

قسمام	:	بعتم جوابات للعزير الفاطمى وعملت مؤامرات.
القاضى	:	بعتنوى وأنا منكم يا أندال.. دا أنا شامى زيكم .. منكم.. رحتم للعزير
قسمام	:	الفاطمى وبعتنوى.. وفتحتوا ثغرة فى البلاد بالمال والرشوه وبعنوا دمشق
القاضى	:	الحزينة وبعتنوى.. آه يا دمشق باعوكى الكبار والزبالين حموكى.
قسمام	:	أنا فى عرضك يا قسمام ما تقتلنيش.
القاضى	:	إذا ما قتلتنكيش حتقتلنى.
قسمام	:	أنا اقتلك ليه دا العزير الفاطنى اللى عايز يقتلك.
القاضى	:	وانت مش عايز تقتلنى.. مش عايز تسلمنى وتقبض خمسين ألف دينار
قسمام	:	دهب فاطمى.
القاضى	:	أنا عايز اتجوز مريم وبس.
سعد	:	آه يا قليل الأدب.. تتجوز واحدة ست متجوزة يا راجل يا أبو عين زايغة يا
القاضى	:	ناقص.
سعد	:	يا سعد أنت قدامك ألف واحدة وسنك صغير ممكن تتجوز غيرها أما أنا
القاضى	:	بحبها.
قسمام	:	أنا حادبك علشان تبطل تتكلم عن مراتى.
القاضى	:	ارجوك لا أنا بأحب الحياه.. بحب الدنيا.
قسمام	:	أنا اللى ح اقتله لأنه خانى وخان البلد.
القاضى	:	الخونه فى كل مكان حتى غسان خان
وليد	:	(يخرج من الصندوق) أنا اللى حاقتله يا أمه.
ليلى	:	(تخرج) أنا اتجوزته بمزاجى سامع بمزاجى.
قسمام	:	(صوت من بعيد .. ضوضاء .. يدخلون صناديق الزبالة)
مريم	:	صوت من بعيد.. كل يستخبي.. تعرف لو اتكلمت حاقتلك واسلم نفسى.
القاضى	:	أوعى تنطق ولا تتكلم.
جندى ١	:	حاضر يا ست مريم (يقترّب منه جندى ١)
القاضى	:	أنت كنت بتكلم نفسك ولا إيه؟
جندى ١	:	ليه هو أنا ا تجننت أنا كنت بكلم قسمام التراب وزعتر.
القاضى	:	هم فين؟
جندى ١	:	فى صناديق الزبالة.
القاضى	:	انت تقلت فى الشراب وألا إيه؟
جندى ١	:	اقبض عليهم فى صناديق الزبالة .. صدقنى.
القاضى	:	هنا (يشير الى صندوق زعتر يخرج فردة للجندي) دى جزمة.
جندى ١	:	مش ممكن .. مش ممكن.. بقولك هنا فى صناديق الزبالة.. موتهم
القاضى	:	اسجنهم.. بس مريم فوتوها لى هى والبت ليلي خدوا زبيدة معاكم.
جندى ١	:	عن إذنك يا قاضى .. روح نام احسن الدنيا برد.. الراجل بيخرف قال زبيدة
زعتر	:	وقسام وعياله فى صناديق الزبالة.
القاضى	:	(يسير الجندي .. يخرج من الصندوق زعتر) ح أفرجك.
جندى ١	:	الحقنى يا عسكرى يا عسكرى.
القاضى	:	(يعود الجندي) إيه يا قاضى
جندى ١	:	اقبض عليه فى الحال.
القاضى	:	مين ؟
جندى ١	:	زعتر.
القاضى	:	فين ؟
جندى ١	:	فى صندوق الزبالة دا.
القاضى	:	

جندى ١	: (يذهب ويفتح الصندوق تمتد يد زعتر بفردة الحذاء الآخر) أه.
القاضى	: يا ناس ح اتجنن.
جندى ١	: انت بتحلم وسكران يا قاضى القضاة عفواً فى الكلام (يخرج).
زبيدة	: (تخرج زبيدة وتسك فى يدها فردة الحذاء) أنا بقى اللي ح أربيك مش الرجال (تضربه ويجرى أمامها تقع عمامته وعصاه ويدخل البستان).
الوالى	: (تعود زبيدة الى صندوق الزبالة) (يخرج من البستان والوالى وعم غسان) أنا متأكد إن البستان مفهوش حد.. يا قاضى يا قاضى (لا يجد القاضى) فين القاضى .. القاضى اختفى.
غسان	: لازم روح بيتهم الدينا برد يا والى.
الوالى	: دى عمامته ودى عصايته.
غسان	: صحيح دى عمامته ودى عصايته
الوالى	: يبقى اتخطف.
غسان	: اتخطف!!
الوالى	: العمامة عمامته والعصايا عصايته فى اتجاه البستان يبقى دخل البستان.
غسان	: طيب ادخل دورة الميه.
الوالى	: ادخل انت ح افضل هنا ح اجيب الجنود وانت طلعه احسن لك يا غسان.
غسان	: اطلعه منين بس ؟
الوالى	: بقولك طلعه من البستان فى الحال.. يا جنود يا جنود.
غسان	: انا داخل اهه (يدخل البستان).
الوالى	: القاضى اتخطف يا جنود... خطفه قسام التراب.. (لا أحد يريد)
قسام	: (يخرج قسام) انا ما خطفتهموش .
الوالى	: تبقى قتلته (يتحدث بحسن نيه)
قسام	: ولا قتلته (يعود يجد قسام أمامه)
الوالى	: الله عمى قسام انت حى . (يرتبك الوالى)
قسام	: ايوه حى يا زعتر.
الوالى	: زعتر هنا ؟
زعتر	: (أيوه جاى) (يخرج من الصندوق) نعم يا عم قسام.
الوالى	: وعم زعتر كما هنا.
ليلى	: (تخرج) يا عمى الحل إيه حنفضل على الحال دا.
وليد	: (يخرج) أيوه يا ابه تقطع رقبة الوالى والقاضى.
الوالى	: فى عرضكم.. ها .. ها أنتم مستخبين فى صناديق الزبالة.
زبيدة	: (تخرج) كتك نيلة مش عجبك الزبالة.
الوالى	: عمى زبيدة كمان هنا.
سعد	: (يخرج) وانا كما يا طويل اللسان.
الوالى	: عمى سعد.
سعد	: اعمل فيه إيه؟
قسام	: اسمع يا وليد .. البس هدم الوالى وارفع علم العزيز الفاطمى معاك
وليد	: وانت يا ابه وأمى حتعملوا ايه؟
قسام	: خد أمك معاك.
زبيدة	: لا يمكن اسبيك لوحذك.
قسام	: خد امك معاك .. اسم الكلام.
وليد	: يا ابه .. اسمعنى.
الوالى	: بلاش حكاية الهدوم دى واروح اجيب له هدم من بيتى فى الحال.

قسام	: بقولك ايه .. اسمع الكلام.
زعتري	: هتقلع الهدوم وألا نقطع رقبتك.
الوالى	: قلعت خدومى.. اهه.
	(يخلع ملابسه ويخلع وليد ملابسه ويتبادل الملايس)
وليد	: كده يا ايه.
قسام	: شكلك فى الهدوم النظيفة حلو.
ليلى	: وانا يا عمى ح اسيبكم ازاي.
زبيدة	: روحى مع جوزك وخلي بالك منه وابقى سمى الواد قسام التراب ولو جيتى بنت سميها زبيدة.
ليلى	: مع السلامة يا أخويا.
زعتري	: مع السلام يا ليلى.
قسام	: يلا مش وقت السلامة.
وليد	: اشوف وشكم بخير.
	(صوت ضوضاء)
	(يدخلان فى الصنادق) (ما عدا والى بملابسه الداخلية)
جندى ٢	: ايه دا.. انت مين ؟
ابن الصمصامة	: (يدخل) ايه دا فيه ايه ... آه.
جندى ٢	: الراجل دا.
ابن الصمصامة	: انت مين ؟
الوالى	: مولاي القائد الكبير ابن الصمصامة.
ابن الصمصامة	: الصوت دا اعرفه.
الوالى	: انا والى متولى.
ابن الصمصامة	: آه صحيح انت متولى.
الوالى	: ايوه انا متولى.
ابن الصمصامة	: ولايس كده ليه ؟
الوالى	: اصل اصلى عيان يا مولاي.. جات لى حمى مش طايق الهدوم اللى عليا.
ابن الصمصامة	: لا حول ولا قوة إلا بالله.
الوالى	: استئذنىك يا مولاي.
ابن الصمصامة	: يا والى استنى لما نجيب لك طبيب.
الوالى	: لا انا حاروح البيت يا مولاي.
ابن الصمصامة	: انا ح وصلك بنفسى.
	(يشير الى الصناديق)
الوالى	: (هامساً) قسام التراب.
ابن الصمصامة	: الظاهر فعلاً ان الحمى تعبك يا والى.
الوالى	: فعلاً أنا تعبان.. بس احب اقولك قسام التراب مستخبى هنا هو وولاده.
	(يجذبه للخروج - يخرج القاضى من البستان)
القاضى	: انت فين يا والى؟
قسام	: (يصفر) (يخرج سعد وزعتري وزبيدة ومريم)
	: أنا اهه اسمع يا قاضى.
القاضى	: نعم.
قسام	: اخلع هدومك واديهها لسعد.
القاضى	: سعد.. لا .. وهدومى ليه؟ انا مش قانع هدومى.
مريم	: اقلع هدومك يا قاضى.

القاضى	: أول مرة تطلبى منى طلب يا مريم تقوليلى اخلع هدومك .. مش لما نتجوز الأول.
زبيدة	: انت بتهزر يا راجل.
القاضى	: اهزر ليه؟ اطلقى من سعد يا مريم الأول وانا اتجوزك واقلع هدومى.
مريم	: طيب اقلع هدوك الأول واديهها لسعد.
القاضى	: وسعد حيطلقك لو خد هدومى.
قسام	: يلا يا قاضى اقلع هدومك .. وانت يا سعد بدل هدومك معاه.
القاضى	: ح اقلع أهه.
سعد	: وانا اهه حالبس الهدوم.
القاضى	: الهدوم دى مليانه براغيث وقمل.
سعد	: اخرس.
القاضى	: مش ح البسها.
سعد	: انت حر.
القاضى	: انت اخدت هدوم طلق مريم بقى.
سعد	: خد عينى وادينى مريم.
مريم	: يا راجل عيب دا انا قد ولادك.
القاضى	: العيب هو انا طالب ايدك على سنة الله ورسوله.
قسام	: يلا يا سعد .. خد مريم وروح بلاد القراميط.
القاضى	: القرامطة.
قسام	: ايوه .. ولما يعرفوا انك جوز بنتى حيرحبوا بيك.
مريم	: انا يا ايه ما سيبكش.
زبيدة	: اسمعى كلام ابوكى.
سعد	: انا مش ممكن اسيك يا عم قسام
قسام	: بقولك ايه يا واد.. لو جبت واد سمييه قسام التراب.
زبيدة	: ولو جبت بنت سميها زبيدة.
القاضى	: حتسيبنى لوحدى هنا؟
زبيدة	: حنسيك للذكريات.
مريم	: مع السلامة يامه.
زبيدة	: مع السلام يا مريم.
مريم	: مع السلامة يا ايه.
قسام	: مع السلامة يا بنتى.
القاضى	: مع السلامة يا حبيبتي.
سعد	: مع السلامة يا عمى.
قسام	: مع السلامة يا سعد خللى بالك من مريم.
	: (يخرج سعد ومريم) (صوت ضوضاء يختفون.. قسام وزبيدة زعتر) (يبقى القاضى بمفرده) (يدخل ابن الصمصامة ينظر يجد القاضى بملابسه الداخلية)
ابن الصمصامة	: انت مين؟
القاضى	: انا القاضى.
ابن الصمصامة	: القاضى.. ايه ايه اللى عمل فيك كده؟
القاضى	: مريم.
ابن الصمصامة	: مريم مين ؟
القاضى	: ايوه مريم بنت قسام التراب.



ابن الصمصامة	مريم بنت قسام التراب .. حلوة.
القاضى	قوى.
ابن الصمصامة	وهى فين ؟
القاضى	مشيت.
ابن الصمصامة	فين ؟
القاضى	راحت بلاد القرامطة.
ابن الصمصامة	(يضحك) وهدوك فين؟
القاضى	خدهم سعد.
ابن الصمصامة	سعد مين ؟
القاضى	جوز مريم.
ابن الصمصامة	هى مريم متجوزة.
القاضى	للأسف وقت لأبوها طلقها رفض.. انا فى نار لما أشوفها جسمى كله يولع نار.
ابن الصمصامة	هى الحمى منتشرة فى بلدكم من امتى واشمعى جسمكم بيولع نار.
القاضى	انا بولع نار لما بشوفها.
ابن الصمصامة	تسمح لى أوصلك لحد الدار.
القاضى	طيب .. الحقها وهاتها قبل ما توصل الحدود.
ابن الصمصامة	حاضر.. حاضر.
القاضى	طيب كلم لى قسام التراب.
ابن الصمصامة	هو فين ؟
القاضى	هنا (يشير الى صندوق القمامة)
ابن الصمصامة	انت متأكد ؟
القاضى	ايوه متأكد .
غسان	أهلاً بقاضى القضاة.
القاضى	قوله يا غسان.
غسان	أقوله ايه ؟
القاضى	قوله إن قسام مستخبى فى الصندوق.
غسان	(يرتبك ويضحك) معقولة قسام مستخبى فى صندوق الزبالة.
ابن الصمصامة	(يجذب غسان بعيداً) هو فيه ايه .. ماله القاضى.
غسان	أصله عقله ساعات بيهوى منه يقلع كدة زى ما أنت شايف.
ابن الصمصامة	والوالى.
غسان	نفس الشئ .. مرض.. مرض عقلى.
ابن الصمصامة	طيب ربنا يشفى.
غسان	أمين.
ابن الصمصامة	ياللا بينا يا قاضى (اثناء حديث القائد ابن الصمصامة مع القاضى.. قسام يخرج ويضرب القاضى على رأسه ويختفى)
ابن الصمصامة	القاضى وقع على الأرض يا جنود.. (يدخل بعض الجنود)
ابن الصمصامة	دخلوه البستان.
غسان	شكراً يا مولاي وديه داره احسن.
ابن الصمصامة	ودوه لداره وأنا جاى معاكم (يخرج خلفهم)
قسام	(يخرج ويصفر.. تخرج زوجته ويخرج زعتر)
غسان	الحمد لله.
قسام	ادى هدومك يا عم غسان لزعتر.

زعتري	: انا لأ.
غسان	: خد يا زعتري هدمي .
زعتري	: اروح فين يا معلمي من غيرك ؟
غسان	: تروح أى مكان.
زعتري	: طول عمرنا يا معلمي ننصف الشوارع ونصفنا الناس وشلنا بلاويهم ما اقدرش أفوتك لو فتك أموت زى السمك لو طلع من الميه يموت.
زبيدة	: يا زعتري جاي.
زعتري	: جاي زبيدة .. نموت .. نموت سوا .. انا لا حيلتى عيل ولا تيل.
صوت المنادى	: يا أهل دمشق الفيحاء .. خمسين ألف دينار لأى إنسان يقبض على قسام التراب.
قسام	: أنا بساوى خمسين ألف دينار .. دا أنا كنت بكسب دينار فى الشهر .. قد كده أنا غالى عند العزيز الفاطمي.
غسان	: ادخل مدد جمسك وكل ونام يا قسام.
قسام	: لا يا عم غسان انت لاح تقدر ولا ولادك ولا حد حيقدر ينام.
غسان	: بتقول ايه يا قسام؟
قسام	: نادى المنادى يا عم غسان.
غسان	: بتقول ايه يا قسام يا ملك الشام؟
زبيدة	: يا ملك الرجال.
زعتري	: يا فارس كل زمان.
قسام	: سبع سنين يا زبيدة .. سبع سنين حكمنا الشام .. جالنا الملوك والفرسان .. جالنا السفراء والأعيان .. حكمنا الشام .. نفطنا الشوارع وحمينا الجدعان سبع سنين .. يا غسان جالى آلاف آلاف الجدعان سبع سنين يا غسان .. آلاف آلاف الدينارين ما خلناش فى الشام فقير .. كان الحب مالى بيتنا ومالى الشوارع.
قسام	: والعلم مكنسة وفقة .. سبع سنين يا زعتري حرب مع الحدود جنود العزيز الفاطمي وناس اتولدت وناس اتقتلت وناس تنجرح وناس تندبح .. زهقت تعبت وفى النهاية هريان فى صفيحة زباله البستان .. لأنى ما نستش إنى زبال .. والزباله اللى حمتنى .. نادى على الجنود يا عم غسان .. وسلمنى واقبض الخمسين ألف دينار ووزعهم على أهالى الناس اللى حاربت معايا وانجرحت معايا .. واعمل وطنى ولو مرة.
غسان	: بتقول ايه يا قسام أنا اسلمك وبايدى.
قسام	: انت حتسلمنى وتستلم خمسين ألف دينار فيه ناس محتاجة دلوقت لدينار وأنا مش ح أفضل طول عمرى هريان.
زبيدة	: اسمع الكلام يا عم غسان.
قسام	: هات حبلى يا زعتري.
زعتري	: حاضر (يخرج حبلى من وسطه)
قسام	: خد يا عم غسان اربطنا أنا وزبيدة وزعتري ونادى جنود ابن الصمصامة.
غسان	: مش معقول يا قسام؟
قسام	: اسمع الكلام يا غسان.
غسان	: مش قادر.
قسام	: اربطنى يا زعتري أنا وزبيدة.
زعتري	: بس.
قسام	: اربطنى يا زعتري انا وزبيدة.

ز عتر	: حاضر.. (يلف الحبل حول قسام وزبيدة)
قسام	: اربط زعتر بقى يا غسان.
غسان	: انا ما اقدرش اربطه حيسألونى ربطهم هم الثلاثة ازاي ح أقولهم ايه أنا وزعتر.
قسام	: دار صح.. خلى زعتر معاك.
زعتر	: انا عايز أروح معاك مطرح ماطروح.
قسام	: اسمع يا غسان إحنا حنعمل إننا نايمين وكنتف زعتر معانا وقوله إنك سقيتنا بنج وإحنا نايمين.
زعتر	: الله يخليك يا معلمى.
غسان	: تعالى يا زعتر لما اكتفك.
زعتر	: (يكتفه) كتفنى قوام.
غسان	: أعملوا نايمين (ينامون)
غسان	: أشوف وشك بخير يا قسام.
	(ينادى) يا عسكر يا جنود.. قبضت على قسام التراب.. قبضت على قسام التراب. (يدخل الجنود و ابن الصمصامة)
ابن الصمصامة	: ايه دا مش معقول قسام التراب.
غسان	: جالى وهددنى هو ومراته وصاحبه.. وعزمتهم وأكلتهم وشربتهم وسقيتهم البنج وناموا كتفتهم.
ابن الصمصامة	: دا صغير مش كبير.
غسان	: دا عيل ٣٦ سنة وبس.
ابن الصمصامة	: انت هایل يا غسان.. لك مكافأة خمسين ألف دينار.
غسان	: حتوديه فين.. حتقتله.
ابن الصمصامة	: العزيز الفاطمى عايزه حى.. عايز يشوفه.. أما مراته وصاحبه دول مش عايزهم.
زبيدة	: مش عايزنا ليه أنا مش ح أقدر اسيب جوزى.
ابن الصمصامة	: انت صاحبه ولا نايمة.
زبيدة	: ايوه صاحبة.
زعتر	: خدنى معاه والنبي يا عم.
ابن الصمصامة	: وانت صاحى يا قسام؟
قسام	: لا أنا نايم.
ابن الصمصامة	: يا عساكر العزيز الفاطمى احملوه على الاكتاف أو زبال فى التاريخ بقى سلطان.. لسبع سنين وحكم الشام لقصر العزيز الفاطمى فى القاهرة.

## ( المشهد الأخير )

(يفتح الستار على العزيز الفاطمي وقد جلس على كرسیه وقد وقف أمامه ابن

### (الصمصامة)

- العزيز الفاطمي : مش معقول يا ابن الصمصامة مفیش دهب عند قسام التراب.  
ابن الصمصامة : ولا عنده دهب ولا حریر ولا ماس.  
العزيز الفاطمي : الله أمال عنده ایه.. وهرب فلوسه فین ؟  
ابن الصمصامة : والله يا مولای حاجة تحیر.. لا مهرب فلوسه ولا عایش عیشة ملوک.. لكن الناس کلها مبسوطة ومفیش وزراء ولا أمراء ومفیش فقراء.  
العزيز الفاطمي : جوز بنته؟  
ابن الصمصامة : قبضت علیه وهو بیهرب على حماره ومعه قفة عیش وجبنة وبصل.  
العزيز الفاطمي : بصل.  
ابن الصمصامة : أصله بیاكل الجبنة والبصل.  
العزيز الفاطمي : جبنة وبصل وهو قائد الشرطة.  
ابن الصمصامة : مش فاهم الناس دول ایه حیوانات.. شهر يا مولای والحرب بینا سجال مرة یهزم ومرة ینهزم.. والخسارة كانت كبيرة.  
العزيز الفاطمي : خسائر فی البشر والمال.  
ابن الصمصامة : لكن المجد لنا يا مولای.  
العزيز الفاطمي : والجوارى.  
ابن الصمصامة : ما عندوش.. عنده واحدة ست شبة الرجالة اسمها زبيدة.  
العزيز الفاطمي : أعوذ بالله.  
ابن الصمصامة : كل يوم بیمر على الشوارع والحواری ویسأل الناس عن أحوالهم ویضحک معاهم ویاکل معاهم ویشرب معاهم ویحاسبهم.  
العزيز الفاطمي : ظریف ظریف.. قسام التراب دا.  
ابن الصمصامة : آه والله يا مولای.. ركبته حمار ومشیته فی شوارع القاهرة لكن الشئ الغریب كل زعران مصر طلعت تحیهه وتصفق له.  
العزيز الفاطمي : کمان فی مصر مشهور.  
ابن الصمصامة : (یخرج ورقة من جیبه) تأمر بقتله وتعلیقة على باب زویلة.  
العزيز الفاطمي : لا يا ابن الصمصامة .. ما اقدرش اقلته احسن یبقى بطل فی عیون الناس..  
ابن الصمصامة : عاش زبال لازم یموت زبال ومش ملک.  
العزيز الفاطمي : والحل؟  
العزيز الفاطمي : حاکموه وحاسبوه مع المجرمین.  
القاضی : (یدخل مسرعاً) الحقنى يا مولای العزیز.  
العزيز الفاطمي : مین دا؟  
ابن الصمصامة : دا قاضى الشام.. بس تعبان شویة.. جاتله حمى قلت اجیبه معایا نشوف له علاج.. لقیته هو والوالی جاتلهم حمى.  
القاضی : انا مش عیان ولا تعبان يا مولای.  
العزيز الفاطمي : انا مش فاهم ایه اللى خلاك عریان.  
ابن الصمصامة : لا .. لازم تفهم ایه اللى خلاك عریان.  
القاضی : قسام التراب.. لما استخبى فی صندوق الزبالة.  
العزيز الفاطمي : (یضحک) استخبى فی صندوق الزبالة.  
القاضی : آه.

ابن الصمصامة	يا مولاي دي تهيوأت.
الوالى	(يدخل جارياً) مولاي .. الحقنى .. إدونى هدومى.
العزیز الفاطمى	مين دا ؟
ابن الصمصامة	والى الشام السابق راخر تعبان.
الوالى	انا مش تعبان أنا عريان وسقعان.. بردان.
العزیز الفاطمى	اديله هدومه حرام عليك يا بن الصمصامة تسبهم عريانين.
ابن الصمصامة	هدوم.. هدوم (يصفق)
الوالى	يا مولاي .. قسام التراب كان فى صندوق الزبالة عند بستان غسان.
العزیز الفاطمى	يحاكم قسام التراب أمام العامة مع المجرمين أمثاله.
ابن الصمصامة	فض المجلس.
العزیز الفاطمى	(يخرج)
القاضى	(لابن الصمصامة) ممكن أحاكم قسام التراب؟
ابن الصمصامة	لا.
الوالى	طيب انا.
ابن الصمصامة	لا.
القاضى	طيب ممكن أقابله علشان عايز أسأله سؤال واحد بس ؟
ابن الصمصامة	تسأل عن إيه ؟
القاضى	موضوع شخصى.
ابن الصمصامة	مفيش مواضيع شخصية قولى الحقيقة.. قول.
القاضى	اسأله مريم راحت فين ؟
الوالى	(للقاضى) يا راجل بطل بطل بقى.. كفاية جواز وطلاق.. (يخرج ابن الصمصامة وخلفه الوالى والقاضى .. مع تحول الديكور الى سجن قسام التراب ومعه زوجته وزعتى ومجموعة من الزعران والحرافيش).
حرفوش ١	واحدة فى سجن الرجال.
زبيدة	انتيل على ع ينك واسكت.
حرفوش ٢	الله .. الله دى يا جدعان.
قسام	دى مراتى.
زعتى	دى مرات ملك الرجال قسام التراب.
حرفوش ٣	قسام التراب ملك الشام.
زعتى	ملك الرجال.
حرفوش ١	وهو هنا ؟
زبيدة	قدامك اهه.
حرفوش ٢	الله امال مش باين ع ليه لبس الملوك والأمراء والمماليك.
قسام	الهدوم بتخبى تحتها حاجات معفنة ومننتة وانت وبختك.
حرفوش ٤	يا سجن القلعة يا رجال ملك الرجال قسام التراب هنا يا مرحبا.
المساجين	يا ألف مرحب.. يا ألف مرحب.
السجان	ايه الدوشة دى .. ايه الزيتة دى.. فين المهيب الملعون قسام التراب.
حرفوش ١	انا قسام التراب.
حرفوش ٢	انا قسام التراب.
حرفوش ٣	انا قسام التراب.
حرفوش ٤	انا قسام التراب.
	(أصوات من خارج الزنازين)
	أنا قسام التراب .. أنا قسام التراب.

قسام التراب	ما تصدقهوش يا سجان أنا قسام التراب.
زعتري	انا قسام التراب.
زبيدة	أنا قسام التراب.
السجان	والبنى ايه انتى قسام التراب يا ولية.. يا مساجين انتهى وقت الهزار.. فين قسام التراب؟
قسام	أنا أهه .
السجان	اسمك ايه الحقيقى ؟
قسام	قسام.. واسم الشهرة قسام التراب.
السجان	انت متهم بالخروج عن الطاعة.. وحاربت العسكر الفاطميين وخرجت عن طوع مولانا العزيز الفاطمى .. الكلام دا صحيح.
قسام	بالعربى الفصيح والصحيح الصحيح.. انا ملك الشام.. ولا اتكلم مع سجان أنا اتكلم مع العزيز الفاطمى.
العزيز الفاطمى	(يدخل) أنا جيت لك يا قسام التراب.
قسام	اهلاً بالملك العزيز .
العزيز الفاطمى	أهلاً يا قسام شفت ازاي غبت ٧ سنين وجيت لى القاهرة.
قسام	القاهرة.. القاهرة.. وجعتوا دماغى بالقاهرة العامة الظافرة.
العزيز الفاطمى	ايوه القاهرة العامرة.
قسام	كان نفسى أشوفها.
العزيز الفاطمى	شفتها.
قسام	وزعلت عليها يا عزيز مصر يا فاطمى.
العزيز الفاطمى	مش فاهم زعلت علشانها ازاي ؟
ابن الصمصامة	نقتله يا مولاي.
الوالى	ندبجه يا مولاي.
زبيدة	قطع رقبتك منك له .
زعتري	اقتلونى قبل منه.
حرفوش ١	اقتلونى معاه.
حرفوش ٢	اقتلونى معاه انا كمان.
حرفوش ٣	وانا كمان.
العزيز الفاطمى	نقتله يا قاضى.
القاضى	بس نسأله الأول مريم فين يا مولاي؟
زبيدة	انت هنا يا مقصوف الرقبة؟
القاضى	انت عمتى زبيدة قوليلى مريم فين هى والولد سعد ؟
العزيز الفاطمى	هنا مريم وسعد وكل ولاد قسام التراب مالها القاهرة يا قسام.
زبيدة	قبضتم عليهم ؟
العزيز الفاطمى	جبناهم .. مالها القاهرة يا قسام ؟
الوالى	القاهرة الماسة الكبرى للعزيز الفاطمى.
القاضى	القاهرة درة قاندنا الهمام جوهر الصقلى.
الوالى	ايوه.
ابن الصمصامة	او عك تقول ان الشام أفضل لما كنت ملكها.
زبيدة	خللى الراجل يتكلم.
العزيز الفاطمى	اتكلم يا قسام.
قسام	القاهرة مليانة زباله .. الورق فى كل شوارع والزباله فى كل مكان.. أنا عملت العلم مقشدة وقفة علشان كل واحد يشيل الزباله.. خلّيت الشوارع

انظف ما يكون.. القاهرة عايز خمسين ألف مكنسة وتتكنس لجل تنظف يا  
مولاي.. القاهرة عايزة زبالين.. مش عايزة حاجة تانية.  
: العزيز الفاطمي  
: قسام  
: انا ما اعرفش القصور.  
: العزيز الفاطمي  
: زبيدة  
: يعيش فى دار وينظف القاهرة ويبقى مسئول عن نظافة القاهرة.  
: (تزغرد) مبروك يا قسام.  
: العزيز الفاطمي  
: آه لو لقيت زبالة فى دمشق وألا الشام يا والى الشام حا احطك فى خازوق  
: وابعت لك قسام التراب (يضحك)  
: قسام  
: افرجنا لى يا مولاي عن كل الزعران والحرافيش فى القاهرة يساعدونى  
: على تنظيفها.  
: العزيز الفاطمي  
: افرجنا عن كل الزعران والحرافيش ويبقوا تحت رعاية قسام التراب..  
: لتنظيف القاهرة.  
: (يتحول المسرح الى أكوام الزبالة التى كانت فى المشهد الأول يجلس قسام  
: وسعد وزعتر وزبيدة ومريم وليلى)  
: شيلتو الزبالة من إمبابية يا ولاد؟  
: قسام  
: سعد  
: شيلناها يا عم قسام.  
: قسام  
: والجيزة؟  
: زعتر  
: شيلناها.  
: ما سمعتش بابا صدر فرمان الضرايب الجديدة على سكان القاهرة.  
: مريم  
: قسام  
: غلبة سكان القاهرة زى دمشق نازلين فيهم ضرايب.  
: ولید  
: وتفكر الناس حتفضل ساكنة ؟  
: قسام  
: الناس اللى بتسكت كتير بتبقى محتاجة قنديل.  
: (يظهر جنود العزيز الفاطمي يراقبون ما يحدث وما يقال)  
: يا عم قسام فيه عيون حواليك وحوالينا.  
: لیلی  
: زبيدة  
: وطى صوتك يا قسام.  
: قسام  
: وطى صوتك يا قسام وامحى اسمك من الوجود .. الخوف عيل ولدوه  
: الرجالة والكلمة الخايبية الجبانة .. يا ناس يا أهل القاهرة خلى بالكم مش  
: حتلاقوا اسمى فى التاريخ.. لكنى كنت حقيقى موجود فى التاريخ وحكمت  
: سبع سنين وبالعادل والميزان وكنت زبال (يمسك المكنسة) وانا كنست  
: شوارع الشام والقاهرة وانتم معايا اكنسوا من التاريخ اللى ظلموكم واللى  
: خانوكم واللى باعوكم واللى عذبوكم.. يا إما تكنسوهم يا إما حيكنسوكم  
: وحيكنسكم التاريخ.. وقدامكم حل من اتنين يا تعملوا تاريخ من غير زبالة  
: .. يا حيعملولكم زبالة من غير تاريخ ويبقى على الدنيا السلام.

## ستار

تمت بحمد الله ١٩٩٢

القاهرة - ١٩٩١

الرؤيا الأول